


# NIHIKU NNE OKALVARIO

 Koxukhuru, Munna Neville. [Munna Neville onira, “Orèriheni, munna!”—Mol.] Muluku orèriheni, Munna Neville. Koxukhuru, vanjene.

<sup>2</sup> Mòxeleliwa, axipatthani. Ola murerelo okhala va mutapernakulo emara ekina, vosisu ula, warumèla Apwiya, mwa enamuna y’olaleya Masu ni wavekelela aretta. Nto miyo kinnixukhuru vanjene mwaha wa nihiku nna.

<sup>3</sup> Nto miyo kari òtikinihiwa, vekèkhai okathi miyo kikenlyaka. Munna mmosa orimorwa khwira, “Miyo nkinthuna okhala ntoko namakuttula ole òhiphwanela àvonihawe.” Ti Munna Wright. Miyo karomuvekelela, nto Apwiya amuvoniha vòmalela. Nto owo orwiye, anlaka, okivaha mukhono, nto n’uhimya wira—wira owo àtthuna waxukhuru Apwiya mwaha—mwaha wo ovonihiwa. Owo atthuna otthika ni oxukhuru. Eyo yothene yorowa. Owo—owo t’ovona vòlikanene vano. Hiyo niri oxukhuru mwaha w’onamona ole.

<sup>4</sup> Vano Charlie, nyuwo ni Munna Jeffries, nyuwo mwatthuna, muwele va mukuxe ikhukulu iya va. Nto nyuwo muri orwaxa ni murettele, vano nyuwo khamurina yo wèmela. Munna mukina vale, ni Munna Wood, muwele pahi va. Nyuwo mwa... Va nòkhala namukhani, mapuro manli va vakhukuluni, vano nyuwo khamurina yo wèmela. Miyo kokhupali, mapuro manli va, ni, ayo, nyuwo mwamukhala owàkheliwa sana orwa ni okuxa mapuro ala.

<sup>5</sup> Hiyo ninnixukhuru o...Miyo kokhupali wira eyo yahihimmwa, emara emosa, “Miyo kahitteliwa murima okathi vireliwaka . . .” Muluku orèriheni, munna. [Munna mmosa onira, “Okathi wothehe okisivela okhala vakhiviru ni mulaleyi.”—Mol.] Koxukhuru. Koxukhuru, koxukhuru. “Miyo kahitteliwa murima okathi vireliwaka, nrowe mpani mw’Apwiya.” Owo ti murerelo wa Mukristu ni otthapa, orowa mpani mw’Apwiya.

<sup>6</sup> Kiwehawehaka, owona anjene a axipatthani aka mu, vosisu ula, miyo kiri òttittimiheya vanjene ni yela. Miyo kinnixukhuru omona Munna ni Murokora Dauch va, anikhuma Ohio. Miyo kinnimona Munna ni Murokora Armstrong ottuli iwe, okhuma Ohio. Muluku orèriheni nyuwo othehe, nave. Nto, oh, owehaweha pahi, nyuwo munowona anjene, yamukhala yorika osuwela masina aya othehe. Murokora Hoover, hiyo ninnixukhuru owonani nyuwo mu, vosisu ula, mukhumaka ohitto oKentucky. Nto Charlie ni Nellie, Munna Jeffries ni ethhoko awe, nto anjene pahi mu, anikhuma ota wa muttethe.

7 Vano hiyo ninwehererya okathi mulupale mw'Apwiya, vosisu ula, niwehereryaka Muluku onithotola hiyo mwa enamuna yo orèriha iroho sahu ni onilalerya itthu hiyo sintthunahu.

8 Nto okathi oniwehaweheka nipuro nothene, kàrowa owihana apatthani aka othene amphwanyaneya mu, miyo kamukuxa vanjenexa vosisu, kihimyaka masina ohiyana-hiyana. Ennikikhaliha wona orattene otthikela okereja, owona atthu othene mpani, orwa othukumana.

9 Enrowa okhala exeni okathi hiyo onrowahu Wirimu, nto hiyo okumana Weiwo mwa okathi ule mulupale wohimala, othukumana vamosa Wohimala, muxerexere wa Ehije ya Muluku, ni iparakhá sene seiyo hiyo othene niphentalyahu? Hiyo, Iwe, ninrowa okhalihíwa ntoko òlattana ni Yowo, ni olikana ni Yowo, nto ni Eroho Awe mwa hiyo, wira nimukokhorele ni omurumèla Yowo wa Mahiku ohimala, nnakhala ohojeya.

10 Mupuwele pahi, khekhanle hat'etthu nyuwo muniweryanyu wupuwelela, yeyo nyuwo enosivelani wira, nave emara ekina nyuwo muhinojeyanyu wira yeyo. Charlie, miyo kòkhupali wira nyuwo ni miyo ninnixayaka mirei ovikana etthu p'itthu hiyo ennisivela wira, mwa enamuna wa yeyo, masi, nyuwo mosuwela, nyuwo munnojeya wira eyo.

11 Nto miyo—miyo okisivela o—wetta, orowa omwako ni wetta pahi. Masi miyo kinnojeya, emara ekina, nyuwo munotthuna wira etthu ekina.

12 Ni miyo onnikisivela wettiha ekaro. Imara sikina miyo kinnikhala owòjeya ni òlamwa, misiphe vasulu. Miyo kinnituphela mukaroni mwaka pahi ni okhuma, ni ovarela elemi, kikhuruwelaka ephiro, kípaka, “Miyo kinnitthapa mana kinniweriya ohimya wira miyo ki mmosa wa yawo,” walá etthu. Kiphuraka elemi ile pahi, ni kípaka, kimanaka nnawo naka, ni kikhuwelaka. Nto, vano, okathi vakhani, kinikhala owòjeya, nto vo miyo kinithikela owani n'upajerya etthu ekina.

13 Masi okathi hiyo onrowahu omukokhorela Muluku m'Omweneni ule musyá, iwe khunrowa nnakhala okhala okathi wo wòjeya, pahi—pahi enrowa okhala okathi wothene eparakha, pahi nihiku ti nihiku. Masi, vekèkhai, hiyo ninrowa otatuxiwa nto. Hiyo khaninrowa okhala ntoko siryahu vano. Hiyo ninrowa okhala ovirikana, atthu òvirikana ovikana hiyo siryahu okathi ula. Vano, hiyo ninnitelliwa murima.

14 Miyo kàmupuwela pahi. Miyo nkisuwenle sinto kòtoko, ohimya ela walá nnari. Munna Charlie, emara emosa khalai, miyo kàri oKentucky ni yowo, nto owo khwira, “Munna Branham, nyuwo munupuwela, oMilenio, nyuwo ni miyo nnoxaya mirei?”

Miyo khwira, “Miyo kinona wira nnari, Charlie.”

15 Khwira, “Vano, hiyo yaninisivela vanjenexa,” khwira, “nyuwo—nyuwo munupuwela wira hiyo nnoxaya okathi hiyo onkelahu oMilenio?”

Miyo khwira, “Nnari, khenrowa okhala hat’etthu yowiviwa oMilenio.”

Nto owo khwira, “Vano, hiyo yaninisivela eyo.”

16 Miyo khwira, “Charlie, anki miyo kawerya owaminihani wira okathi uwo mwari ekuluwe, ni nyuwo marimunnuwa khukhala mutthu mulupale, wira mukhale mutthu? Mwamurowa tho, otthuna otthikela ni ohakalalela s’opuha sa ekuluwe?”

Khwira, “Nnari.”

17 Miyo khwira, “Mòne, nyuwo mwamukhala mulupalexa ovikana ekuluwe, vano, nyuwo mwa mutthu, nyuwo nnakhala khamwatthuna okhala ekuluwe tho.” Miyo khwira, “Vano munjererye yeyo imara ikonto miloko, nto eyo t’ile enrowanyu okhala okathi onrowanyu otatuxiwa okhuma va mw’etthu enrowanyu okhala. Nyuwo nnakhala khamunrowa otthuna okhala tho mutthu.”

18 Ti yeyo. Eyo enrowa okhala etthu yovirikana. Miyo kinnixukhuru pahi mwaha wo wupuwela yeyo, osuwela wira nihiku nimos a hiyo nnowela osulu.

19 Ahe, vano, vari wira Apwiya anotthuna, Ettiminku enirwa, yeyo enrowa okhala mwaha wa . . . Nto miyo kinorowa okhuma, kirowaka mpakha oWyoming, ni mpatthani orera murima; walá mpakha Idaho, ni mpatthani aka òrera murima, Munna Miner Arganbright, Munna Clayt Sonmore, Alipa a Nakoso a Akristu.

20 Esumana enirwa, esumana ekina aya, ti vano; ya 7, miyo kihana okhala o—oDallas, Texas, mwa Muthukumano Nsu Ninvonih a. Nto ohiyo aka wo olavula ti wa 7. Nto vo miyo kinohokolowa, wira kirowe mpakha Idaho ni Munna Arganbright ni Alipa a Nakoso a Akristu. Nto alakela nnokhalana ohiyo omosa oMinneapolis, nihinatthi okhuma. Nto vo mmosa olya wa vosisu wa Akristu Alipa a Nakoso.

21 Apwiya yatthuna, Ettiminku enirwa miyo kintthuna kitthikele vava mutapernakulu tho, nto eyo yakhala yoweryaneya ni wakhala otthuna w’Apwiya. Nto miyo kintthuna olavula mwaha wa *Eyupuru Mwa Epheyo*, Apwiya yatthuna. Eyo yàri ntoko okhala va murimani vaka, esumana yothene.

22 Nto vosisu omosa, vama laka oxa, wophiyeryaka iwora xexe sa vosisu, miyo karovenya nto kikhalana mupuwelo ola, “Nihiku nne oKalvario.” Vano miyo kintthuna kilavule yeyo, vosisu ula: *Nihiku Nne oKalvario*.

23 Nto vano wa osoma nno, nrowe nikhunle vano mBibiliani mwahu, mwa Yolempwa, wa Ehapari yorera ya Matewu Owarya, ekapitulu 27. Vano hiyo ninrowa opajerya ni eversikulu 27

nto nisome nipuro nimosa wa Yolempwa ela, wira niphwanye ilipiheryo sahu, vano hiyo ninrowa opajerya nananoru. Nto numalá muteko wo olalerya, nto hiyo ninrowa okhalana ovekeleliwa wa aretta.

<sup>24</sup> Nto, oh, opajerya okathi wokiserya va, kittikihieryaka pahi, ni ethonyeryo wa muthinto musyá wa muteko aka. Miyo kahikhalana onamona warwiye okhumaka wa muthukumano ole miyo kahatonko aka okhalana mwa okathi munjene.

<sup>25</sup> Yokhala etthu mwaha wa yeyo, wira nyuwo muhana omukwannya mutthu uwo, wohijala wunnuwaxa xeni enoniheriwaya. Masi, mone, openuwa ohana okhala mo wamini wa mutthu. Vano, mutthu akhalana wamini . . .

<sup>26</sup> Nto awo annona, ntoko, Eroho Yowarya orowa mmuthukumano ni wira, “*Elexe-lexe* mori ehiraneya. Nto, eyo, nyuwo mwa *lexe-ni-lexe* nsina. Nto nyuwo munikhuma nipuro *khata*. Ni etthu *khata* nyuwo mwiralyanyu. Nto eyo enrowa okhala enamuna *ela*.” Ni wona sothene iyo wiraneya vekèkhai enamuna yeyo!

<sup>27</sup> Nlelo, mutthu, akilanthene vavo, àhana oweha ni wira, “Owo ohana okhala Muluku. Miyo kinnakhela openuwa waka.”

<sup>28</sup> Masi, ohiya vo, mutthu onira, “Mwixathi matata mwa miyo ni mukilompele, wira kivonihiwe.” Masi eyo ti enamuna hiyo nnixuttihiwahu w’Amerika nno, ni, siso, wira nàmini yeyo. Nto eyo vekèkhai ti Yolempwa.

<sup>29</sup> Masi vano hiyo niphwanyana, w’Afrika ni mapuro ovirikana, ohiya pahi etthu ntoko eyo wiraneya, muthukumano wothene onàkhela emara emosa, onimwakhela openuwa waya, okhala wira awo khanatoko wixuttihiwa hat’etthu. Munnona? Awo nnakhala khayixuttihiwe openuwa. Nto vo okathi awo anonàya yeyo, awo annisuwela wira òkhala Muluku ori mukumi. “Nto Owo àri mukumi, Owo—Owo ti mulupalexa, ni Owo—Owo onnipenuxa.” Nto ti yeyo, okhala wira mulipiheryo woheleliwa, ilipiheryo, wira Owo ti mpenuxa, ni onnapenuxa atthu. Vano okathi awo anonàya Mukhalelo Awe ovaraka muteko eriyari ya Ekereja Awe, nto awo annira, “Eyo ennimaliherya. Eyo ti yothene hiyo entthunahu.”

<sup>30</sup> Masi hiyo nihixuttihiwa, “owixatherya matata aretta,” ni itthu siso. Ti vo eyo khenireya orattene w’Amerika.

<sup>31</sup> Vano, mupuwele, Ettiminku enirwa vosisu, Apwiya yajaleya, Munna Neville onolopola yeyo, vekèkhai. Nto . . . e . . . *Eyupuru Mwa Epheyo*.

<sup>32</sup> Vano, miyo kòvahani okathi vakhani wira mukhunle mwa Solempwa sanyu, mwa Matewu 27. Nipajere osoma mwa e—eversikulu 27, ya Ehapari yorera ya Matewu Owarya. Vano niwiriwane orattene osommwa.

Nto anakhotto a kuvernatoro yahimuroiha Yesu mpwaro mwa milattu, ni wahimuthukumanela muttitthi wothene wa anakhotto.

Vano awo yahimurula ikuwo, khunwariha ekuwo yoxerya.

Nto okathi awo yupalyaya ekhara ya miwa, awo yahinwariha yeyo mmurini mwawe, ni mutathi mmatatani...mwawe: nto awo yahikokhora oholo wawe, ni omunyemula owo, yiraka, Ehali, Mwene aYuda!

Nave-tho awo yanimusenyeriya, akuxaka mutathi uwo, khiyammana owo vamuru.

...awo numalá omutheya, yahimurula ekuwo eyo, nto khinwariha-tho ikuwo sawe, khumuroiha wira yamukhomele va mwikimanyo.

Nto okathi awo akhummyaya vale, yahimphwanya mulopwana oKirene, a nsina Simoni: awo yahimukhanyererya owo omukuxerya mwikimanyo awe.

Vano okathi awo arowalyaya, arowalyaya mpakha nipuro naihaniwa Golgota, eyo piyo, nipuro na nikarakasa,

Awo yahinvaha wira awurye evinakre yotakanxeriwa ni wamwe:...okathi owo valawinhawe, owo khâwunrye tho.

Nto awo yahimukhomela vamwikimanyo, khukawanasa ikuwo sawe, ni yahavya eparakha: wira emaliheriwe ele yahimmwe ni profeta, Awo akawanasa ikuwo saka eriyari aya, ni ikuwo saka ahaverya eparakha.

...akilanthi ene awo yanimulipelela vavo;

Vano yahipweha...vamuru vawe mulattu mmosa walempwe, OLA TI YESU MWENE A YUDA.

Vano vavo yahikhala anawiye anli yakhomeliwe vamosa ni yowo, mmosa mono wolopwana, ni mukina mono wothiyana.

Nto ale—ale yavira vavale yaninveha, attikinyaka miru saya,

Ni yiraka, Weyo mulipa-opwexakasa empa ya Muluku, n'uteka yeyo mahiku mararu, wisòpole mmansawo. Weyo wàri Mwana a Muluku, okhuruwe vamwikimanyo vo.

Siso tho alupale a anamukuttho yaninveha, n'awixutithi a ikano ni mahumu, yiraka,

*Ole òwòpola atthu akina; mmansawe owo khanwerya wisòpola. Owo ary-ene Mwene a Isarayeli, akhuruwe nanano vamwikimanyo vale, vano hiyo nnomwamini.*

*Ole ànimuroromela Muluku; yowo amòpole vano, vari wira owo onomopola: mana owo anihimya wira, Miyo ka Mwana a Muluku.*

*Anawiye tho, yakhomeliwe poromosa ni yowo, yanimuveha yowo sisale.*

*Vano okhuma ewora ya nethanu na mosa yahikhumelela ewiriphi mulaponi mothene mpakha ewora ya nethanu na xexe.*

*Nto ewora ya nethanu na xexe Yesu ahikhuwela ni nsu nulupale, iraka, Eli, Eli, lama sabaktháni? eyo enihimya, Muluku Aka, Muluku aka, mukinyanyalenleni?*

*Akina wa awo yari vavale, okathi vaiwalyaya yeyo, yahira, Mulopwana ola onimwihana Eliya.*

*Nto nananoru mmosa...ahitthimaka, khikuxa exponxa, khunaniha ni evinakre, khuhela vamutathini, khinvaha wira awurye.*

*Akina yahira, Mmuhiye, nimone sinto Eliya onimorwa amopole.*

*Yesu, okathi owo okhuwenlyawe-tho ni nsu nulupale, ahikhumiha eroho.*

*Nto, siso, ekuwo ya mpani mwa Muluku yahikhereya ipantte pili opajera osulu mpakha vathi; nto elapo yahitetereya, ni miyala sahiphweyasa;*

*...mahiye yahuhuwas; nto mirutthu sinjene s'anaxariya yawo yarupa sahihimuwa,*

*Nto yahikhuma mmahiye numala ohihimuwa wawe, ni yahikela mmuttettheni mowarya, khwisoniherya w'atthu anjene.*

*Vano okathi mukhulupale a anakhotto, n'ale yari ni yowo, amulipelelaka Yesu, vonalyaya elapo etetereyaka, n'itthu iye sakhumelenle, awo yahova vanjene, yiraka, Tthiri ola ari Mwana a Muluku.*

<sup>33</sup> Nuramihe miru sahu okathi vakhani pahi wira nilompe.

<sup>34</sup> Pwiya, hiyo nosuwela wira Nyuwo mwa Muluku. Nto eyo...Numalá osoma Masu ala òrerihwa ni owarya, hiyo nlelo ninniweya wona wira mukhalelo Anyu khorukununwe. Nyuwo khula okathi mwa Muluku. Nto eyo yakhala ntoko wira Yesu kharowa okhalana hatá mukhaliheryo, wira Owo akuxiwe ni matata òtakhalana ni khuthikilasiwa kapatti-kapatti, n'usenyeriwa, n'unyemuliwa, ni othomeiwa vamwikimanyo, avuvaka ephome, akhwaka. Ni yakhala ntoko wira khiwakhanle

mukhaliheryo, hatá nipuro, mpakha Owo okhuwela, Mmansawe, “Muluku Aka, Muluku Aka, mukinyanyaleneni?”

<sup>35</sup> Masi, Nyuwo munira etthu okathi hat’etthu ekena ehiniraya etthu. Hiyo ninnivaheriwa osuwela, Pwiya, wira hiyo nakhalana miratthi hiyo sihinweryahu olapuwa, hiyo nakhalana miyako sihinweryahu owela, Muluku onnisuwela sana wira itthu akina ahinweryaya wira.

<sup>36</sup> Nyuwo mwa muratti, mmutekoni, mana Nyuwo mwanisuwela niwoko na nihiku nne oKalvario. Nyuwo, muryene Muluku, Ole ohinimala, mwahisuwela wira okathi ula ohana orwa. Masi okathi omaliheriwaya, nto Nyuwo mwahoniherya wira Nyuwo mwari Muluku. Nyuwo mwahimoniherya T’ani ari mukhulupale. Nyuwo mwahittikinya elapo, ni masantu yarupa vathi yahikhuma. Nyuwo mwahiripaha nsuwa ohiyu, sintoko epiphi y’ohiyu, moniheryaka wira Nyuwo mwari Muluku. Masi Nyuwo moneya ntoko okhala òmàla okathi munjene.

<sup>37</sup> Munihiye, mwa yela, niphwanye nikano nla, wira, okathi hiyo nnikhalahu nettaka mwa Eroho, nettihiwaka ni ntata na Muluku, hatá enakhalaru ntoko etthu yohiloka, nlelo hiyo nniweha oKalvario; Muluku onolavula ewora yòtthuneya, okathi wòtthuneya.

<sup>38</sup> Vano, Tithi Muluku, hiyo nàmuvékela oleveleliwa wa itampi sahu ni sottheke sahu. Hiyo nàmuvékela Eroho Anyu wira enihòlele. Munihòlele, ntoko Epompa yamuhòlelaya Mwapwittipwitthi. Munihiye nikhale ottharihela etthu p’itthu enrowa onikhumelela, nisuwelaka ela, wira Muluku onivara itthu sothene orattene, n’usuwela wira sinokhala sothene sòrera.

<sup>39</sup> Mukhalé ni hiyo olelo mwa muteko ola. Hiyo ninvekela wira Nyuwo muwopole ale ari mukhalelo wo wopoliwa, ni amphavela wopowa. Mwasarihe ale ni Ekumi Yohimala, ale amphavela yeyo. Hiyo ninvekela wira Nyuwo mwavonihe ale anwereiwa ni òripiwa murima, yawo arwiye, yavyaka openuwa. Nto hiyo nnimovuwihani Nyuwo mwaha wa yeyo. Hiyo ninvekela mwa Nsina na Mwan’Inyu, Mopoli ahu, Yesu Kristu. Amen.

<sup>40</sup> Vano, wa olavula vosisu ula, hiyo nintthuna wihana owiriyana wanyu wa yosoma miyo kithanlale aka wira kilavule mwa yeyo: *Nihiku Nne oKalvario*.

<sup>41</sup> Enikhala ntoko yamukhala vakhani-ene okathi wohiphwanela; ela yàhana okhala Enamathanu Yorera. Kalvario wàhana wupuweliwa khula nihiku. Nto hiyo ninniwa vanjene mwaha wa weiwo, nosoma vanjene mwaha wa weiwo. Alaleyi annilalerya yeyo, okhuma wopajeryani wa okathi. Alipa-òwipa ahipa yeyo, mwa okathi. Maprofeta yahihimya yeyo, mwa iyakha ikonto nlelo ehinatthi nnakhala okhumelela. Ni maprofeta a nihiku nla annithonya ottuli okathi eyo ekhumelenlyaya. Nno nihiku nulupalexa! Nno nimoso wa mahiku malupalexa a mahiku othene Muluku otonko awe ohiya oxa elapo ya vathi.

<sup>42</sup> Nto vâri wira nno nulupalexa wa nloko n'atthu, Kalvario, miyo kinona wira ti yorerela hiyo otthikela ottuli ni otthokelela, wona pahi etthu nno nnihimyaya wa hiyo. Mana, miyo kokhupali, okathi ula wokiserya hiyo nnikhalahu, hiyo nimphavela khula eyulupale ya Muluku wira hiyo niwerye osuwela. Ni sothene hiyo sinweryahu osuwela, hiyo niri va wira nixutte yeyo, wira nône exeni iyo wa hiyo, ni etthu Muluku iralyawe mwaha wa hiyo, ni wona etthu Owo ohimmyawe wira mwaha wa hiyo. Nto eyo t'ile hiyo enrwelehu okereja. Ti vo mulaleyi onlaleyawe, ti vo owo onisomawe ni onthokelelawe mwa Yolempwa, ni wavya moniheryo, okhala wira owo murumeyi a atthu othene wa atthu a Muluku. Nto owo onehererya ophwanya etthu enrowa...ele Muluku arowawe okhalana wira ahimerye atthu Awe, etthu emosa yarowa wakhaliherya. Khino, eyo poti okhala, walamula mwa itampi saya, masi yamukhala mukhaliheryo wira wavenxe yawo, wira awo ahilyé itampi saya nto vo avenye wira yarumèle Apwiya. Nto arumeyi yâhana ophavela itthu iya.

<sup>43</sup> Nto nihiku nna, nikhalaka nulupalexa, nimoso wa mahiku malupalexa, niwehe mwa itthu ttharu sovirikana nihiku nne nahimyaya mwa hiyo. Hiyo namuwerya okuxa imiya-sene. Masi, vosisu ula, miyo kithanlale ttharu sovirikana, itthu s'ekumi seiyo hiyo ninthunahu oweha, mwa okathi vakhani oholo, etthu Kalvario yahimyaya wa hiyo. Ni miyo kinvekela wira emulamule khula natampi ori mu; eyo enomwiriha khula santu orowa okokhora; eyo enomwiriha khula mutthu onwereiwa ovenxa wamini wawe wa Muluku, ni wetta arowaka, ôvonene; khula natampi, owòpowa; khula mutthu okhotta ohokolowa, ni wuliwa muru mwanene; ni khula santu, otthapa, ni ovarela nvarelelo musyá ni nrromelo musyá.

<sup>44</sup> Etthu emosa yulupale, yulupalexa Kalvario enihimyaya wa hiyo ni olumwenku, ti, eyo yomaliha mwaha wa etampi, namukhuluwi. Mutthu aphwanyaneya ôttheke mwaha wa etampi. Nto etampi yari ehukumu yeyo ahakhanle mutthu àwerya oliva. Ehukumu yari yulupalexa mpakha vahakhanlyawe hata mutthu àwerya oliva ehukumu. Miyo vekèkhai kinnikhupali wira Muluku àreherenrye eyo enamuna yeyo, wira ehukumu yarowa okhala yulupalexa wira khavo mutthu àwerya oliva, vano Owo àniwerya wira, Mmansawe. Vano, ehukumu ya etampi wari okhwa. Nto hiyo othene ahu niyariwe mutampini, nipakiwe mwa sotakhala, nirule molumwenkuni, nilavulaka sowooha. Ti vo khakhanle nnakhala mmosa wa hiyo ari òphwanela, walá, khivaweryaneya ophwanyiwa hata mmosa mulaponi ari òphwanela.

<sup>45</sup> Vano etampi khepajenre elapo ya vathi. Etampi epajenre Wirimu. Luci...ari...Lucifer, xetwani, ari yopattuxiwa ohukumwa, mwaha wo ohìwelela wawe, owo ahinatthi omorela mulaponi. Etampi epajenre Wirimu, weiwo Muluku



àhenlyawe Malaikha, ni sikina, mwa mukhalelo mmosaru yowo Owo ahelenlyawe atthu; osuwela, mwiri w'osuweliha, mwiri wa Ekumi, ni mwiri w'osuweliha, vavo mutthu aweryawe okuxa othanla wawe. Nto okathi Lucifer ovahiwawe murerelo, wira athanle, owo atthunne etthu yoreraxa ovikana ele Muluku arinawe. Eyo epajeriha mulattu.

<sup>46</sup> Nto yahikhala yavekeliwa mwaha wa etampi. Yavekeliwa wari okhwa. Okhwa ti wari ehukumu. Nto, eyo ti, hiyo namuwerya ohimya emosa-emoso wa etthu ila, okhala wira miyo nkinamini wira yokhala wohikhala okhwa. Yokhala Ekumi emosa. Vano miyo kinnamini wira mutthu orina Ekumi Yohimala khankhwa. Ni miyo kinnikhupali wira wokhala omalamalihiwa vomalela wa munepa ole onttheke, mana Bibilia ohimya, “Munepa onttheke, owo vekèkhai onimokwa.” Kahí mutthu; “*munepa* onttheke.” Vano, Satana ohana vekèkhai okhwa, omalamalihiwa vòmalela. Mota miyo kinivirikanaka ni mauniversalista anihimya wira Satana onimopowa! Owo òttheke, ni owo t'uri mpattuxa a etampi. Nto munepa awe wottheke; n'uwo ari eroho. Eroho ele enomalamalihiwa vòmalela, wira ehikhale etthu enihala wa yeyo.

<sup>47</sup> Vano okathi etampi ephiyalyaya mulaponi, ottuli wopajeryani, ntoko ekuwo y'ewiriphi emoraka okhuma wirimu, eyo vowòneya yahemexa elapo. Eyo yahimoroxa khula yopattuxiwa, mulaponi, ni sopattuxa sothene sa Muluku, mwepotthani. Mutthu ari mwepotthani m'okhwa, eretta, mikattamiho, oxanka. Mukhalelo wothene wahimora ni yeyo. Etampi yari anestesiku vekèkhai àrakalinhe elapo. Nto vo hiyo nàri mumu, òhiroromela, 'okhala wira khula yopattuxiwa mulaponi yari vathi va yeyo. Ni khula mutthu oyariwa mulaponi ari vathi va yeyo.

<sup>48</sup> Vano, eyo yàhana okhuma Nipuro nimosa vahakhanle etampi. Eyo khivaweryaneya okhuma mulaponi. Mmosa wa hiyo khawerya onvuluxa mukhwawe. Eyo yàhana okhuma wa Mukina.

<sup>49</sup> Ti vo, okathi mutthu osuwenlyawe wira owo ahivalanyihiwa ni Muluku awe, owo ahikhala nawettasa pure. Awo yahinla. Awo yahikhuwela. Yahivara muteko. Awo yahettasa pure, mmiyakoni ni mothakoni, yavyaka Muttethe yowo muratti ni namateka àri Muluku. Mana, owo anisuwela wira owo akhalakhanle ahokolowelaka Oholo wa Muluku, owo amuwerya olavula yeyo ni Yowo. Masi khiyakanle hatá enamuna yohokolowa. Owo ahirimèla. Owo khasuwela ephiro xeni yorukunuwela, vano owo arokhuma pahi, ettasaka, ahovelaka ophwanya nipuro vavo owo arowawe ophwanya ephiro y'ohokolowela Nipuro nne. Etthu emosa muhina mwawe yanimulèla wira owo okhumme ni—Nipuro nimosa nari nòloka. Khakhanle mutthu va mutthukomano ola onòneya, vosisu ula, walá mwa muthukumano wa efita ya makinete, weiwo ela enrowaya elapo

yothene, khakhanle hatá mmosa va, walá nipuro pi nipuro, ohimphavela oloka weiwo.

<sup>50</sup> Nyuwo munoliva ikontha sanyu, nyuwo munimupuwela, “Eyo enomaliha.” Okathi nyuwo munikhalananyu ikontha sanyu soliviwa, vano okhala mutthu onwereiwa vatthokoni vanyu. Okathi eretta enkhalaya sana, vano nyuwo mokhalana tho ikontha wira mulivé. Etthu yopajera nyuwo ensuwelanyu, ikharari sanyu sinikhala sottwèlela, nto vo munthuna otthikela omiravo. Vano yokhala etthu okathi wothene, vohihyerereya, nto mwaha wa niwimpi nne n’etampi. Masi mmurimani mwanyu, okhala wira nyuwo munavya yeyo, eyo enoniherya wira yokhala Yoloka nipuro nno. Nipuro nno, yokhala etthu.

<sup>51</sup> Ti vo, imara sinjene, olelo, natampi nlelo onimwettasa pure. Mwamuthiyana, òrera onometta ikharari sawe vakhani, wira akhale òsuweliwa; opintari witho wawe, wira emukhalihe òrera; owara ikuwo wira oniherye enamuna y’ekhalelo awe. Okhala wira, eyo ti etthu emosa pahi owo oniweryawe ophwanya, ophwanya nipuro nimosá wira ererye ophwanya etthu enimuhokolowela, okathi owo onakhalihawé alopwana amopelaka nturi yowo, omukwata, osivelana ni yowo. Mwammiravo onomwirela etthu emosaru muthiyana, wèrerya wikhalihá mmansawé òtthuneya wa yowo. Ananawatta manani anòteka empa, n’ukhalihá enamuna emosa, okhala wira eyo enokhala yorera vakhani ovikana empa ya namwattamanani awe. Eyo p’ukathi wothene, hiyo nnavya etthu, nto etthu enikhala erowaka vakhani vasulu va yeyo pahi. Mwamuthiyana onomuphwanya mwamuthiyana mukina okhanle otepa osuweliwa onvikana owo. Namwattamanani onophwanya empa enoneya ntoko yoreraxa ovikana y’awawe. Muthiyana onomuphwanya muthiyana mukina aiwarin’he ene enamuna emosa, enikhala ntoko yoreraxa onvikana owo siwanryawe.

<sup>52</sup> Yokhala etthu mwa hiyo, enavya etthu ekina, nto eyo enoniherya wira hiyo nopweteya. Hiyo nintthuna niphwanye etthu emosa yeyo enrowa oniruha vo otteliwani murima vavo, enrowa osariha nipuro nenno n’etala muhina mmo, nave enikhala ntoko hiyo khanniwerya ophwanya. Atthu ahererya yeyo mwa okathi sivinre. Awo yahinlela yeyo. Awo yahikhuwela. Awo yahira itthu sothene awo yasuwelaya wira, masi nlelo awo khayaphwanya, yettasaka pure mulapani mothene.

<sup>53</sup> Vòkiserya, nihiku nimosá, nenno ti nihiku nne n’oKalvario, ahikhala Mmosa akhurunwe akhumaka m’Ovuwani. Mmosa, mwa Nsina na Yesu Kristu, Mwana a Muluku, Yowo orwiye akhumaka m’Ovuwani, nto Kalvario ahipakiwa. Nno ti nihiku nenno esisapo yaliviwaya, nto mulattu wa etampi wahimalihiwa namukhuluwuru. Nto nno nahitthukula ephiro mpakha etthu yela hiyo nnivoleliwahu etala ni nnivoleliwahu ntthona. Eyo yoruha nipuro n’otteliha murima. Khavo mutthu otonko oxekurya oKalvario, khiweha enamuna nàryaya, onwerya

okhala mmosaru. Itthu sothene owo otonko awe otthuna walá owehererya, eniphwanywa, okathi owo oniphwyawe nipuro nne.

<sup>54</sup> Nno nari nihiku nulupalexa, ni etthu yulupalexa, nno nahittikinya olumwenku. Nno nahittikinya olumwenku, sintoko wahatonko aya ottikinyiwa khalai. Okathi Yesu okhwiyawe oKalvario khuliva mulattu wa etampi, olumwenku ula wa etampi wàrina ewiriphi. Nsuwa nahitupwela othana eriyari, nno nahiphwanya ovolola. Ni miyala sahittikinyeya, miyako sahiphweya, nto mirutthu sakhwiye sahikhuma mmahiye.

<sup>55</sup> Exeni nno nìralyaya? Muluku àroluluwanya wo, oKalvario. Owo ahimuvulaliha mwaxinama ole, onihaniwa Satana, mahiku othene. Vano owo onikhala owalixa okhuma vavo, okhala wira eyo eruhale Warya mwa nloko n'atthu. Ni khula mutthu onnisuwela wira mwaxinama òvulalihiwa t'otepa owali, apaseyaka ni muthana awe wowunteya. Vano, Satana oxinttiwe, oKalvario. Elapo yolipiherya wira owo oxinttiwa.

<sup>56</sup> Esisapo yulupalexa etonko oliviwa, ni Mmosa tu àwerya oliva yeyo, ahirwa kwira yeyo oKalvario. Ti weiwo esisapo yulupale eliviwaya. Eyo ti emosa wa itthu iyo. Muluku ahivekela yeyo. Khavo mutthu aphwanela. Khavo mutthu awerya. Khavo mutthu awerya wira eyo. Vano Muluku khurwa, Mmansawe, nto khwipaka mutthu, khukhala makhalelo a mutthu, ni s'otthuna sa mutthu, nto khukhomeliwa oKalvario. Nto weiwo, okathi Satana upuwelawe wira Owo kharowa wira eyo, Owo kharowa ovira mwa yeyo, Owo ahirowa oKetisimani ni khula wèreriwa mutthu ti mutthu otonkwawe okhalana. Owo ahivira mwemmo vekèkhai ntoko atthu othene, masi Owo ahiliva esisapo.

<sup>57</sup> Vano eyo ti yeyo yàripin'he elapo. Yari ntoko anestesiku, a operasao. Okathi tothoro oninvahawe mutthu anestesiku, owo ompajera omuhileiha, owo ahinatthi wira. Nto okathi Muluku ovahalyawe o—operasao wa Ekereja, olumwenku wahimphwanya anestesiku, sopattuxiwa sahiluwela. Khivanxankiha! Muluku, mwa erutthu ya mutthu, àmokhwa. Owo wari okathi olumwenku wàweherenryaya, enamwí anjene wa yawo yahasuwenle.

<sup>58</sup> Sintoko eryaya olelo, anjene anniphavela itthu iya, nave nlelo awo khansuwela. Awo khansuwela ephiro. Awo nlelo anihovela wavya opuha ni itthu sa molumwenkuni, yereryaka ophwanya ephiro.

<sup>59</sup> Yahikhala, akhala mapawe manjene yawo yathonya nihiku nenne, iruku sulupale sinjene. Nno nahihimmwa vahinatthi ni mwapwittipwitthi, ni mwanyompe, ni nsiya, ni itthu iya sothene, nave nlelo iyo khisawenrye omaliha. Iyo khisawenrye omaliha ikuru iye sa mokhwani, vavo Satana ahenlyawe-vo elapo.

<sup>60</sup> Miyala seiyo owo atonko awe wettha vo, osulu ni vathi mulaponi, makukulu òvarela! Lucifer ari mwana a vosisu, nto owo ànètta mulaponi okathi eyo yaryaya miyako sàvarela.

Miyala seiyo sàrinrye, okathi Yesu okhwiyawe oKalvario, sahamuleliwa otá w'elapo.

<sup>61</sup> Esisapo yahiliviwa, ni ekhaporu wa Satana wahipwexiwa. Muluku ahihokoloxerya mmatatani mwa mutthu, ephiro yotthikela yeyo owo aphavelawe. Owo kharina tho yo wunla. Ahimana, okathi Owo ontalyawe muthana wa Satana, iwe oKalvario, muthana wa etampi, wa eretta! Nto eyo ennimuruha khula mutthu onikhwa, mulaponi, otthikela Oholo wa Mukulu, ni itampi soleveliwa. Aleluya! Itampi sahu soleveliwa. Nnakhala tho Satana khanwerya onirìpihela wa Muluku.

<sup>62</sup> Yokhala ephiro y'osulu epakiwe. Okhala telefoni opwehiwe vavo. Yokhala elinya enrowa m'Ovuwani, ennimuruha khula mutthu ophwanya elinya eyo. Mutthu akhalana itampi sowatta, eyo yomulupanya ni esenterale. Owo onnileveliwa etampi iyo. Kahí yeyo pahi, masi etampi iyo yoliveriwa. Oh! Nyuwo khamurina yowira, "Miyo nkimphwanela." Vekèkhai, nyuwo khamumphwanela, nyuwo khamwarowa ophwanela. Masi Ole omphwanela okuxa opuro anyu. Nyuwo motaphuwa. Nyuwo khamurina-tho yo wettasa pure. Nyuwo khamurina yo okhala mutthu omphavela s'opuha mulaponi mu.

Mana yokhala ephattuwelo yosareya Ephome,  
 Enikuxiwa mmutikani mwa Emanuweli,  
 Okathi anatampi ampwinaya vathi  
 mohuruwelani,  
 Annapweteya malepa aya othene òttheka.

<sup>63</sup> Nyuwo khamurina yo opweteya. Wokhala mphito worera, ni Ephiro, nto eyo enihaniwa Ephiro y'ererele murima. Ole òtakhala khanivira mwemmo. Mana, owo onorwa vephattuwelo, toko, nto vo owo onnikela mphito worera.

<sup>64</sup> Owo omaliha ikuru sa Satana. Owo otthukula mukhora wa ekhatteya y'omoronni, wa khula mutthu àri òtthukeliwa, mulaponi mu, mukhatteya, òvaka okathi wakhwawe, ele okhwa warowaya okhala mwa yowo. oKalvario, Owo otthukula mikhora sa ikhatteya iye, khimuhiya khula namutthukeliwa okhala otaphuwa. Nyuwo khamurina tho okhala otoloxiwa ni etampi. Nyuwo khamurina tho y'ovahererya ipante sa erutthu anyu mutampini, muwuryaka, mumpahaka sona, mmwettaka juku, mòthaka. Nyuwo munniwerya okhala òloka, naxariya, ni a ehakhi. Nto Satana khanwerya wira hat'etthu mwaha wa yeyo, okhala wira nyuwo movarela elinya, elinya ya Ekumi yeyo evarihiwe mwa Mwalá wa Okathi. Khiyavo etthu eniwerya wottikinyani Vavo. Khisavo ipheyo sinwerya wottikinyani Vavo. Nnakhala hat'etthu, nnakhala hata okhwa wene, khoniwerya onivalanyiha ni ophenta wa Muluku ori mwa Kristu Yesu. Eyo t'ile yahimya Kalvario.

<sup>65</sup> Atthu yari mw'epotthani yahitaphuliwa. Atthu yatonko wova okhwa khanova tho okhwa. Mutthu awehererya vanjene

Muttetthe, yowo muratti ni namateka, Muluku, owo onniwerya wetta mphito worera, ni ovenxa ethoni awe ewehaka Wirimu, okhala wira owo t'otaphuwa. Aleluya! Owo t'ovuluxiwa. Owo khamphavela tho wettasa pure, mana yòkhala enamuna yo osuwela nyuwo mwari mw'ekèkhai walá nnari. Muluku onninivaha Ekumi. Itampi sahu sòmala. Nihiku nne oKalvario nòliva esisapo. Okathi hiyo nnonahu sothene iyo, khivanxankiha namalepa olempyawe:

Eriyari ya miyala sokhunuwa ni osulu worìpela  
Mopoli aka ahuramiha muru Awe khukhwa.  
Okhereya w'ekuwo ohoniherya Ephiro  
Wa otthapa wa Wirimu ni nihiku nohimala.

<sup>66</sup> Abrahamu khàrina tho yo wettasa pure, mulaponi, aphavelaka muttetthe. Natampi kharina y'oxanka tho, vàri wira owo onimopowa walá nnari. Mutthu onwereiwa kharina yo oxanka vàri wira owo onovonihwi walá nnari. Okhereya w'ekuwo, nihiku nne oKalvario, ehoniherya Ephiro y'oxintta w'omalela. Muluku onivaha owerya wa Eroho Awe, wira nikhaleke voxintta-wene mwa itthu iya sothene; onnivekela hiyo wamini pahi. Yeyo ekhumelenle nihiku nne oKalvario. Khanakhanle nnakhala nihiku ntoko nne. Khaninkhala nnakhala nikina ntoko nenne. Khanintthunaneya tho. Esisapo ti yoliviwa, ni hiyo novuluxiwa. Ni mahala a Muluku! Hiyo novuluxiwa. Khekhanle tho nyuwo murinanyu yoxankela. Khekhanle tho yo wanyiherya yeyo. Eyo yothene yokuxiwa. Ekuwo yopurula ekurtina, nto hiyo noheliwa mumphitoni worera, wira nihixanke tho, masi nàmini ni wetta pahi nrowaka. Hiyo nnetta nrowaka Oholo wene wa Muluku.

<sup>67</sup> Abrahamu ànisuwela, ni akina yànisuwela, wira okathi awo yavyaya Muttetthe, awo yànisuwela wira awo yakhumme Nipuro nno. Etthu yahikhumelela. Awo yakhala elapo yo wemexiwa. Itetere sahirwa. Ipheyo sahirwa. Ikhotto ni wiva! Mwiji ni mwapwittipwitthi yamukhurana mmosa ni mukhwawe, walá mwiji àmukhura mwapwittipwitthi, ni kharamu onikhura enyompe. Eyo khenoneya orattene. Yokhala etthu evonyen'ye. Owo ànisuwela wira yahikhala etthu yavonyen'ye. Atthu nto munna onimwiva munn'awe; tithi onimwiva mwana, mwana onimwiva tithi. Yokhala etthu evonyen'ye. Owo onimuluvala. Owo onimokhwa. Owo onimòjeya. Eretta eri mwa yowo. Owo ori mw'epotthani. Miri sinninnuwa, masi khasihiyo sohikhwa. Iyo sinnokhwa. Miyako sinnirukunuwa. Iphareya sinniwelela. Màsi annivukuwa. Yokhala etthu evonyen'ye. Nto owo aphavela nipuro, Muttetthe weiwo iyo sahakhumelelaya tho. Owo anisuwela, owo awenryeru okhalakhala atthikelaka Oholo wa Ole àpanke eyo orattene, owo àmuwerya olavula ni Yowo.

<sup>68</sup> Oh, oreriwa xeni, natampi, oryaya, vosisu ula, osuwela wira nyuwo mophwanya Ephiro vano. Nihiku nne oKalvario

notthukula ephiro. Wa axititthi ale othene yaxayaya ni yaphavelaya, Kalvario ohovahani yeyo nyuwo, mahala. Mota xeni nyuwo munikhottanyu? Mota xeni nyuwo munikhottanyu, wira mwitakanihe n'romolelo? Mota xeni nyuwo munikhottanyu, wira mwakakhanye etthu ekina ni yeyo, s'opuha sa molumwenkuni? Xeni muhinikhupalelanyu? Okhereya w'ekuwo onnimuhokoloxa mutthu mpakha Oholo wa Muluku, ehikhanle etampi mwa yowo, ya hatá muthinto. Ni eniruha ephiro oholo wawe, wa etthu owo omphavelawe: Erimu, ovuwa, murettele, Ekumi Yohimala, itthu sothene oholo wawe yowo.

<sup>69</sup> Nihiku nne nari ni—nikuma nowiva ikuru sa Satana. Nno nàhimaliha itthu sothene.

<sup>70</sup> Nto miyo kinniwerya omona Owo vale; Owo ari mwapwittipwitthi o Edeni, mwa eruku yopajerya onirwawe.

<sup>71</sup> Okathi Abeli, ni wamini, anvahalyawe Muluku mukuttho wòtepaxa orera onvikana Kaini, owo siso àkuxale mwi—mwiri wa ewuva muxikoni wa mwapwittipwitthi, khumukwiha nantirya vanlukuni. Khikuxa n—nluku mmatatani mwawe, ntoko nivaka, nto khirukunxela ottuli muru awe mwamukhani, khumuhoma ni khumuthikila mpakha owo okhwa. Nto manri awe yànanishiwa ni ephome awe yeyo. Owo ahunya vaphomeni vawe. Eyo yari eruku.

<sup>72</sup> Masi nihiku nne oKalvario, khakhanle mwapwittipwitthi a elapo yela, nave ari Mwapwittipwitthi a Muluku, yowo akhwa, ahunyaka Vaphomeni Vawe Yeyo. Owo ahithikiliwa, ni ohommwa, ni omaniwa, ni osenyeriwa, ni wulumeliwa, ni omaniwa, ni itthu sothene, ni olumwenku, nto Ephome ettonyaka mukhararini Mwawe.

<sup>73</sup> Okathi mwapwittipwitthi a Abeli okhwiyawo, owo àkhwiye, alavulaka nttava Abeli ahaweryawe wiwa. Owo àmunla.

<sup>74</sup> Nto okathi Mwapwittipwitthi a Muluku okhwiyawo nihiku nne oKalvario, Owo ahilavula nttava nenno ahakhanle mutthu amwiwale Owo. “Muluku Aka, Muluku Aka, mukinyanyalenleni?” Owo àri Mwapwittipwitthi a Mukulu, àthikiliwe kapatti kapatti, àhommwe.

<sup>75</sup> Owo ari Mwapwittipwitthi yowo Abeli arinawe mmuruni, okathi owo onalyawe osùlu wahimmwe wa muthiyana. Owo àri Mwapwittipwitthi Daniyeli àmònyawo, yowo àthikiliwe vasulu va mwako, vahi ntata. Owo àri Nttheke eriyari ya nttheke, wa maprofeta. Sothene awo sonalyaya sari somaliheriwa nihiku nne, nihiku nne oKalvario. Nenno nirun'he muhina etthu yulupale. Nenno nintale muthana wa Satana.

<sup>76</sup> Yopajerya, hiyo nàhana ophavela etthu nihiku nne nnihimyaya. Ya nenli, hiyo nàhana wona etthu nihiku nne niralyaya wa hiyo, vano, etthu nne niralyaya wa hiyo. Vano,

ya nèraru, nòne etthu yatthuneya hiyo wira mwaha wa nihiku nne. Exeni yatthuneya hiyo wira?

<sup>77</sup> Yopajerya, hiyo nàhana oweha nenno, mana nne nihiku nulupale, nulupalexa na mahiku othene. Esisapo ya etampi yahimaliheriwa. Ikuru sa Satana sahimalihiwa.

<sup>78</sup> Nto vano hiyo ninthuna none etthu yatthuneya hiyo wira wo otthuvela. Vano, wo otthuvela, okathi Yesu okhwiyawo oKalvario, oKalvario nihiku nne, Owo khalinve pahi esisapo ya itampi sahu, nave Owo olinve esisapo ni khupaka ephiro wira hiyo niwerye omutthara Yowo; mana hiyo, ntoko Adamu amonre yowo ovuluxiwe. Ntoko Eroho yamuhola Adamu (Adamu opajerya) ni Eroho, yeyo yarina wetiha wa elapo òthene, vano hiyo (Adamu a nenli), walá mutthu a vathi òvuluxiwa ni Kristu, okhuma nihiku n'oKalvario, ninniwerya omutthara Yowo. Vano, okathi Owo okhwiyawo oKalvario, Owo òpaka ephiro. Owo ahivahererya Eroho, Eroho Yowarya, Yeyo ovelenyawe etthikelaka elapo ya vathi, wira nyuwo ni miyo nikhale mwa yeyo. Eyo t'itthu Kalvario enihimiyaya wa hiyo, wira nimutthare Yowo.

<sup>79</sup> Yopajerya, oweha yeyo, wona etthu eyo yiralyaya wa hiyo. Nto vano exeni entthuneya hiyo wira mwaha wa yeyo? Exeni entthuneya nyuwo ni miyo wira?

<sup>80</sup> Vano, hiyo nnira, “Vano, miyo—miyo kinnittotopela eyo. Eyo etthu yoreraxa.” Masi hiyo nihana okhupali iyo. Nto okhupali iyo, wakhela Omutthu Awe, Kristu mmurimani mwahu.

<sup>81</sup> Vano, hiyo niri òtaphuwa mwa etampi, ti vo khakhanle makwijili a etampi òthukeleliwa mwa hiyo, nnakhala. Muluku, vekèkhai ntoko hiyo khinnatoko ottheke, Mukuttho wòloka onnikhaliha hiyo òloka. Mana, Yesu ohimnye, “Mukhalé òrera murima vomalela, sintoko Atith'inyu Wirimu siriyaya òrera murima vomalela.” Vano, khekhanle tho ekina yo wiriwa, masi hiyo nnikhaliwa òloka Oholo wa Muluku.

<sup>82</sup> Vano, ti vavo hiyo nnipwetexahu mukhalelo ahu. Hiyo nahiwehe, hiyo nnererya oweha ottuli n'uweha ele hiyo naryahu. Nto okathi hiyo oniwehahu ele hiyo naryahu, Mukuttho khonihimya hat'etthu wa hiyo. Oh, nyuwo khamuniwerya wona eyo, ekereja? [Muthukumano onira, “Amen.”—Mol.] Miyo nkarowa nna. . . Miyo nkàrowa wehererya muteko. Miyo nkinwerya, ni hatá nyuwo khamuniwerya. Khivantthuneya wehererya. Nyuwo mwa òpweteya, opajerya wene, okathi nyuwo oniwehanyu etthu mwiralyanyu. Masi muhiweheke etthu nyuwo mwiralyanyu.

<sup>83</sup> Nweheke ele nihiku nne oKalvario niralyaya wa nyuwo. Nno noliva esisapo anyu. Nno nomaliha mwaha. “Itampi sanyu sinakhalaru soxerya; iyo ti sottela ntoko nakhutu. Sophilivila ntoko karmesim; sottela ntoko manri.” Vano nyuwo khamurina hata etampi. Nyuwo khamurina etampi vomalela. Khena nata

etthu mwiralyanyu, walá muniranyu, nyuwo nlelo khamurina etampi. Okathi nyuwo onimukhupalyanyu Yesu Kristu ntoko Mopoli anyu, itampi sanyu ti soleveleliwa. Etthu p'itthu *eleveliwe* ti “yoleveleliwa ni yoliyaliwa.”

<sup>84</sup> Vano exeni eyo eniraya? Eyo enovahani nyuwo, numala mukhalelo owo, Eroho Awe, wira mmuthhare Yowo, ni wira sintoko Owo iralyawe, wa akina ale antthara. Owo ari Mulopwana pahi, Mulopwana òloka. Owo òvaha Ekumi Awe, nto Owo opanke ethonyeryo wa nyuwo. Vano exeni entthuneya hiyo wira?

<sup>85</sup> Vano, etthu yopajerya miyo entthunaka ohimya, t'ila, Yesu khatonko wikhalela Mmansawe. Ekumi Awe yavahereriwe akina. Eyo, vòmalela, Ekumi Yohimala. Nyuwo mwiraka wira munnirowa okereja, ni wira munnira itthu sòrera, eyo ti yorera. Masi mwakhalaka makhelelo anyu mmansinyu, nyuwo khamurina Ekumi Yohimala. Ekumi Yohimala, okhala mwaha wa atthu akina. Eyo ehoniherya okathi Eyo yarulyaya mwa Mwapwittipwitthi a Muluku. Owo ahikhala, ni ahikhalana Ekumi Yohimala, okhala wira Owo khaikhalela Mmansawe. Owo akhala mwaha wa akina. Nto nyuwo munakhela Ekumi Yohimala, mwakhelaka nihiku nne, nto nyuwo khamunikhalela mmansinyu tho. Nyuwo munikhala mwaha wa akina.

<sup>86</sup> Mutthu mmosa ahimye, “Mota xeni oniweryanyu ovilela, omuhiya khula mutthu owìhanani masina òtakhalala awo?” Nyuwo khamunikhalela mmansinyu. Nyuwo munikhala mwaha wa akina, wira nyuwo mmuvuluxe mutthu uwo. Nyuwo munikhala axana. Nto mulattu aya ti wira, ekereja yoliyala wira yari axana. Nyuwo mwa mwana. Nyuwo munikuxa nipuro na Kristu. Nyuwo mwa mwana, vano muhikhaleleke mmansinyu. Mwakhalelele akina.

<sup>87</sup> “Ahe, Munna Branham, miyo poti omukhalela munna *ola*, okhala wira owo vekèkhai mutthu òrera murima.” Khahí yeyo.

<sup>88</sup> Mmukhalele mutthu ule oniwinani. Mmukhalele mutth'ule àrowa owivani vakhanle wira aniwerya. Ti yeyo awo yamwirenlyaya Owo. Awo yahimwiva Owo, vano Owo khukhwa, wira Owo awopole. Eyo t'eri Ekumi Yohimala. Okathi, nyuwo, ale ari vamurimani vanyu, nyuwo muniweha Wirimu nto. Masi nyuwo munivahererya itthu sanyu, ohiya, ntoko epwittipwitthi enivahaya manri aya. Nyuwo muniweha oholo, muwehaka oKalvario.

<sup>89</sup> Miyo kinwehererya wira ela yokhaliheryeni ophiya vatthu. Eyo t'ile etaparnakulu, eyo t'ile atthu othene, arinaya yo wira, ti osuwela ele nyuwo muryanyu, ni niwoko ti nivi. Ekereja, khahí orowa okereja pahi wopa isipo, wipa isipo. Ekereja ti nipuro vavo ottharuxiwa. “Ophukiwa onipajerya mpani mwa Muluku.”

<sup>90</sup> “Hiyo nihana wikhaliha okhwa, ni akumi mwa Kristu.” Nto, Owo òpaka ephiro wira hiyo nivahererye mmansihu wa muteko



Awe, wira nimutthare Yowo. Hiyo namutthararu Yowo, hiyo nnikuxa makhalelo yawo Owo okhanlyawe. Eyo ti yoreraxa.

<sup>91</sup> Yesu ohimnye wira, ni òlavula yeyo. Mukihiye pahi miyo kovaheni sohimya vakhani wa yeyo. Nwiriyaane orattene. Muhihalele. Yesu ohimnye wira, Nihiku nne Owo amwavalanya athu, ntoko ipwittipwitthi ni ipuri. Nto Owo àmuhimerya ipuri, “Mukhalé mono wothiyana.” Nto ipwittipwitthi, “Mukhalé mono wolopwana.”

<sup>92</sup> Vano Owo khuhimerya ipuri, “Mukhume wa Miyo. Okhala wira, Miyo kahivoliwa, nave nyuwo khuhikivaha yolya. Miyo kari mukhatteya, nave nyuwo khuhikixikurya. Miyo kahithaleliwa, nave nyuwo khuhikivaha ikuwo. Miyo kahivoliwa ntthona, nave nyuwo khuhikivaha màsi. Miyo kahiwereiwa, nave nyuwo khuhikithotola. Vano, mukhume wa Miyo.”

<sup>93</sup> Vano wa ipwittipwitthi, Owo ohimnye wira, “Miyo kahivoliwa, nyuwo mukivaha yolya. Miyo kahithaleliwa, nyuwo mukivaha ikuwo. Miyo kahiwereiwa, nyuwo mukikhaliherya.”

<sup>94</sup> Nto nwehe. Muhihalele wakhela ela, ekereja. Muhele ela mmurimani mwanu, mahiku othene. Eyo yiriwe vòhisuwela! Athu khanira etthu ila mwa mwetelo wa nikano. Mutthu onovahani nyuwo etthu, okhala wira owo ohana wira, mutthu onovahani nyuwo yolya okhala wira ohana wira yeyo, owo okhalana mupuwelo wo wisona. Eyo yàhana okhala makhalelo anyu a ekèkhai, miteko sanyu s'ekèkhai.

<sup>95</sup> Eyo yari yotikiniha wa ipwittipwitthi iya, mpakha awo yiralyaya, “Pwiya, okathi xeni Nyuwo mwavoliwanyu? Vano hiyo khihovahani yolya Nyuwo... Okathi xeni Nyuwo mwavoliwanyu, vano hiyo novahani yolya? Okathi xeni Nyuwo mwathaleliwanyu, vano hiyo novahani ikuwo? Okathi xeni Nyuwo mwavoliwanyu ntthona, vano hiyo novahani màsi? Okathi xeni Nyuwo mwawereiwanyu, vano hiyo nokhaliheryani?”

<sup>96</sup> Eyo yari vòhupuwelela wo ophenta, Ekumi Anyu pahi yakhala mwa yawo. Muluku, mwahiye athu yone etthu Kalvario enirenyaya hiyo, vòhupuwelela wene.

“Okathi xeni Nyuwo mwarayanyu, Pwiya? Hiyo khinnatoko osuwela eyo.”

<sup>97</sup> Nkawehani etthu Yesu àrukunuwalyawe khuhimya, “Mwa sothene nyuwo muwirenlyanyu ala, mukirenle Miyo.”

<sup>98</sup> Makhalelo òhisona; khahí mupuwelo wa nenli. Khahí wupuwelela yeyo; nave nyuwo muri okhwa wa itthu sa molumwenkuni mu, nave mukumi mwa Kristu, nto mwettaka mphito worera, wira itthu iyo itthu sòhupuwelela pahi. Nyuwo munimwira pahi. Khahí wira, “Ahe, vano, Apwiya yamu, Apwiya, anthuna wira miyo kireke yeyo.” Khahí yeyo. Nyuwo

mwa epantte a Yowo tu. Eroho Awe eri mwa nyuwo, nto nyuwo munira sintoko Owo iralyawe. Ah! Mwakhele ethhu ila.

<sup>99</sup> “Ehavo ephiro enoneya orera wa mutthu, masi omalela waya ephiro ya wokhwani.”

<sup>100</sup> “Khahí othene anira, ‘Pwiya, Pwiya,’ anòkela-mo, masi ale anira sintthunaya Atithi Aka,” mmurimani mwaya pahi, mahalene pahi.

<sup>101</sup> Vano, nihiku nne oKalvario nahiliva esisapo, wira hiyo nikhale enamuna yeyo.

<sup>102</sup> Khahí wira, “Nyuwo mosuwela, namukhweli Jones emara emosa ari...Owo khàrina makhala, nto miyo kirowa kimuthumela makhala. Miyo kinimolelani nyuwo, miyo kahimona munna mmosa àthhuna ikuwo sowara, nto miyo kahirowa khinvaha owo ikuwo sowara. Attotopeliwe Muluku! Miyo ka Mukristu.” Oh, wulu! Nyuwo owisona, namuhawi, mutthu òtakhaliwa. Nyuwo mwa namirima mili.

<sup>103</sup> “Muhihye ntata nolopwana osuwela ethhu ntata nothiyana nñiraya, ni nothiyana osuwela ethhu nolopwana nñiraya.” Vòhupuwelela pahi òkhwa mwa Kristu, mpakha nyuwo wira eyo, enamuna p’inamuna. Owo ti mukhalelo anyu. Owo t’upakiwa wanyu. Nyuwo munimwira, enamuna p’inamuna. Eyo pahi Ekumi enikhala mwa nyuwo. Nyuwo muri owivahererya vòmalela wa Eroho eyo, nto Eyo enikhala Mmansaya mwa nyuwo. Oh, nyuwo munnona Eroho eyo yòrerihwa, Ekumi iyo! “Nkihiyo miyo kinikhala,” ohimmye ti Paulo, “masi Kristu onkhala mwa miyo,” vekèkhai vòhupuwelela.

<sup>104</sup> “Vano, miyo kinimolelani, Munna Branham, hiyo na Akristu nno. Hiyo ninnakaliherya athhu *ala*. Hiyo ninnakaliherya athhu *ale*.” Oh, wulu! Ehaya mwa nyuwo. Owo khuhiyo Okristu.

<sup>105</sup> Okristu pahi vòhupuwelela ohana wira. Eyo ehana wiriwa. Ni nyuwo munoliyala pahi, sothene iyo, “Miyo nkihiyo.” Murowe, mwire.

<sup>106</sup> Kristu ahivahererya pahi vòmalela ekumi Awe wa Muluku. Owo ahivaha Mmansawe, ntoko namàrumela athhu, wa athhu. Owo ahivaha ekumi Awe, mahala. Owo khàrina yo wira eyo. Owo khirale vòhitthuna. Owo khahimmye wira, “Vano, axinna, nyuwo othene mwàhana okùpuwela Miyo vanjene, okhala wira Miyo kirwenle wokhwelani nyuwo.” Owo khatonko ohimya nolumo nimosa mwaha wa yeyo. Owo ahikhwa, enamuna p’inamuna, okhala wira àri Muluku mwa Yowo.

<sup>107</sup> Owo Muluku mwa nyuwo, owo Muluku mwa miyo, onniriha hiyo waweha akina. Ipwittipwitthi, epantte emosa.

<sup>108</sup> Mmosa wa awo onimwira, “Ahe, Pwiya, miyo kihira *ela*. Nto, Pwiya, miyo kihira *ele*.”

<sup>109</sup> Owo ohimmye wira, “Mukhumé wa Miyo, nyuwo anamwira sotakhala. Miyo nnakhala nkinatoko wosuwelani.”

110 Vari wira ekereja enniwerya ophiya mpakha mwa itthu iya sòphaveleya, eyo khehiyo etthu nyuwo munereryanyu wira, nyuwo munivaranyu mmansinyu wira mwire. Eyo etthu eniyariwa mwa nyuwo.

111 Mukilevelele, mpatthani aka Mupentekositi. Miyo ki mupentekositi. Masi axipatthani aka aPentekosite àphiyererya nipuro, vavo erinaya yokhala i—isipo sinjene sowakuva, sirumaka wa makhuru kamosa kamosa, walá wopa ikuphi, walá ikoma, wira aruhe onyakula. Eyo wùkhuwa pahi. Awo anopa mmakhuruni ahinatthi orowa okhottoni. Awo anàkeliha atthu mo wùkhuwani w'ekhotto. Miyo kinnamini isipo. Miyo kinnamini wopa ikuphi. Masi miyo kinnamini itthu iyo. Iyo vekèkhai ekhweli. Hiyo nihana okhalana iyo.

112 Masi nyuwo mohiya itthu sulupale sihìriwe, makhalelo ale owivahererya yale Muluku onkhalawe mwa nyuwo, vòhupuwelela mwiraka ele eri yoloka okhala wira eyo ti yoloka. Murowaka oholo pahi, hatá muhupuwelaka hat'etthu mwaha wa yeyo. Mukhalaka pahi. Nto nwehe, nyuwo munimona etthu eniraneya. Nyuwo pahi. . . nyuwo khamu. . . Nyuwo muri mphito worera. Eyo t'ile Kalvario yahimyaya mwa nyuwo, mphito worera, wotthukuliwa nihiku nne wa nyuwo.

113 Vano, vano mupuwele, nyuwo khamunwerya okhala nusu epuri ni nusu epwittipwitthi. Iyo khasinrowa otakanihana.

114 Vano, akhala atthu anjene anira, “Ayo, nyuwo mosuwela xeni? Hiyo nokhalana mutthenkeso mmosa nnikhuruni mwahu. Hiyo, hiyo ninnakhaliherya atthu òhawa. Hiyo ninnira *ela*.” Eyo ti yorera, masi nyuwo munopa nlope nanyu mwaha wa yeyo. Nyuwo muhireke sisò.

115 “Nyuwo muvaheke esimola anyu wiphini,” Yesu ohimya. Vòhupuwelela pahi, etthu emosa wa nyuwo, yohatta ntoko orowa, okuxa masi owurya. Nyuwo murina ntthona. Mutthu onirwa àrinene ntthona, nyuwo munomupuwela yowo, tho. Mutthu mukina onttthuna etthu, nyuwo munomupuwela owo enamuna emosaru ntoko mwarowanyu wupuwela y'otthuna anyu. Nto muhiwehaxaxeke yeyo. Mukhaleke pahi.

Vano, nyuwo khamunwerya okhala nusu epwittipwitthi nusu epuri.

116 Vano nyuwo mwira, “Ahe, ekereja ahu yokhalana mutthenkeso mmosa. Hiyo ninnavaha atthu òhawa, nto hiyo ninnira *ela*, ni ninnira *ele*, ni ninnira *ekina*.”

117 Nyuwo mwakhalana eyo muhirina ele ekina, Ekumi ya Kristu mwa nyuwo, nyuwo nunira mahalene mará. Yesu. . . Paulo ohimya, aKorinto Opajera 13, “Hatá miyo kivahaka mihakhu saka sothene wira kaliye atthu òhawa, ni okhalana erutthu aka yopahiwa ntoko mukuttho, eyo nkiniphwanyerya hat'etthu.”

118 Vano, eyo ti yorika, nave Ekekhaí. Nyuwo muhana orwa mpakha yokhumelela ele, osuwela etthu Kalvario yiralyaya wa nyuwo. Hiyo nniweha yeyo, ni wira, “Oh, ayo, eyo ti yorera.” Eyo khehiyo yeyo. Vari wira Mwana a Muluku ule ahana orowa oKalvario, wira akhomeliwe, khula mwana onirwa ohana orowa oKalvario. Owo ohana tho okhalana Kalvario. Nyuwo muhana okhalana nihiku nne n’oKalvario. Miyo kihana okhalana nihiku nne n’oKalvario. Eyo t’enimaliha mwaha wa etampi. Khahí ovahana mukhono ni mulaleyi; khahí okakheliwa mukereja; khahí orwa-mo ni epaphelo; khahí orwa-mo ni olapha. Masi orwa-mo mwa Oyariwa. Owo khatonko ovaha epaphelo. Owo khatonko ovaha olapha. Owo ovanhe Oyariwa. Eyo ti mota hiyo nniwahu-mo. Vano, mwa yeyo, vohupuwelela hiyo nnikhala makhalelo a oKristu.

119 Vano, monelo mukina. Nusu epuri, nusu epwittipwitthi, awo kharina etthu iyo. Nyuwo mwa epuri walá epwittipwitthi. Nyuwo khamuhiyo nusu epuri ni nusu epwittipwitthi. Nyuwo mwa epuri walá epwittipwitthi.

120 Vano, nyuwo mwiraka itthu sorera pahi, ni wupuwela wira nyuwo munokela-mo, ni seiyo, weso khinarowa otthunaneya okhala nihiku n’oKalvario. Ikano sahivelèliha yeyo. Masi, nikhalaka okuxiwa nihiku nimosá n’oKalvario, nari wira nikelihe-mo yeyo, wira hiyo nihikhaleke atthu a mukereja pahi, masi nikhalé àna alopwana n’athiyana a Muluku. Eyo t’ile nihiku n’oKalvario naryaya. Eyo t’ile yahimyaya wa nyuwo, wira nyuwo mwireke, ni mutthareke, ni mwireke ntoko Yesu.

121 Vano, muró khunivira orowaka osulu ni vathi, okathi mmosaru. Muró onikela epantte emosa pahi. Nto Eroho ya Muluku enikela epantte emosa pahi. Eyo khenitakaniha itthu ni Yeyo. Enikela epantte emosa.

122 Nkanweheni Yesu, wo omalihani. Yesu ohimya, “Miteko sinvaraka Miyo nave tho nyuwo munovara, ni sulupale ovikana iya nyuwo munovara, mana Miyo kinrowa w’Atithi Aka.”

123 Miyo nkinihimerya ela ekereja ela va pahi. Nyuwo muniwa sana. Masi Mitthaka iya sinokaravariwa. Miloko a ikonto animwiwa, mulaponi mothene.

124 Miyo kinrowa wakhula mwaha owo wa alipa-owùlumela, nanano va. Miyo imara sinjene kinnihimyaka . . . kohimya. Awo anira, “Vano, nyuwo munnimwamini Bibila? Yesu ohimya, ‘Miteko iya Miyo sinvaraka nave-tho nyuwo munovara, nto sulupale ovikana iya nyuwo munovara, mana Miyo kinrowa w’Atithi Aka.’”

125 Ohisuwela xeni orinanyu, mulopwana? Orakamela xeni wo othokererya munweryanyu wetta, ni ateologia anyu a ankhili, ni mupuwelo anyu wa ankhili wa etthu p’itthu? Mpatthani aka òphenteya ni opweteya, nyuwo khamunwerya wona wira Bibilia ola ontaphuleliwa ni eroho?

126 Yesu ohaxukhuru Atithi wira Awo yahipithiha Eyo wa ale òsoma, òratta, ni a ankhili, ni a miruku, ni khiwupululela Eyo axikhani wira awo arwe oKalvario.

127 Vano nwehe. Yesu ohimya. Nkawehani mota Owo ohimmyawe yeyo. “Miteko Miyo sinvaraka,” Owo onivara seiyo nanano va. “Miteko Miyo sinvaraka nanano, wavoniha aretta, wahihimuxa ale òkhwa, otthukula maitho a alipa òhòna, miteko iya nave-tho nyuwo munovara. Nyuwo munovara iya mwakaminiru Miyo. Nyuwo munovara miteko iya. Nto vo yulupale ovikana ela nyuwo munovara, mana Miyo kinrowa w’Atithi Aka.”

128 “Okathi vakhani, nto olumwenku khunrowa okona tho Miyo, nave nyuwo munokona Miyo. Miyo kinokhala ni nyuwo, hatá mwa nyuwo, mpakha omala wa olumwenku. Miyo nkinohiyani òripiwa murima. Miyo kinimwavekela Atithi; Awo animovahani Mulipa òkhaliherya mukina, yowo okhanle Eroho Yowarya, yowo olumwenku ohinweryaya omwakhela; nave, nyuwo munniwerya omwakhela Yowo.”

129 Vano nwehe. Miteko “sulupalexa,” wari okhalana Owerya Mukereja, khahí wo wavoniha aretta pahi ni mavekelo, owomola axetwani ni mavekelo, masi wavaha Ekumi Yohimala alipa-owamini. Eroho Yowarya yamorwa, ni ovahereriwa mmatatani mwa Ekereja, wira evahe Ekumi. Oh! Eyo t’ile Kalvario yahimyya. Eyo yahakuxa alopwana, n’athiyana òpuheriwa ònyoholiwa, khwavenxa yawo mpakha nipuro nimosa, wira akhale axana alopwana n’athiyana a Muluku, wira yavonihe aretta ni wavaha Ekumi Yohimala; yavahaka Eroho Yowarya wa alipa-owamini òttharihela, alopwana yatonko okhala òhamini, okhalihiwa owàmìni, ni ovahiwa Ekumi Yohimala ya murohoni. Mota xeni ekhanlyaya yulupalexa eyo, wira . . .

130 Muthiyana ola muretta ompathale va, miyo kinowerya ovekela mavekelo o wamini nto owo onovonihiwa. Eyo etthu yulupale. Eyo t’ile Owo ìrawe nto.

131 “Masi,” khwira, “sulupale ovikana iya nyuwo munovara. Miyo kinrowa wovahani Owerya, khahí y’omuvenxa okathi vakhani, masi onvaha owo Ekumi Yohimala, yeyo enrowa okhala Yohimala, mahiku othene.” Atthu òhawa, òhona, òtakhaliwa, mota xeni nyuwo enihalelanyu iyo? Khamunona ele ekhanle etthu “yulupale?” Eyo t’ekhanle etthu yulupalexa yawerya okhumelela, wari okeliha Ekumi Yohimala mw’atthuni. Exeni Ekumi Yohimala? Ekumi Owo okhanlyawe, Ekumi yari mwa Yowo, wavaha Yeyo akina. Mutthu onniwerya wira eyo? Mwana a Muluku onniwerya.

132 Yesu ohimya, “Ale anrowanyu walevelela itampi, awo anoleveliwa; ale anrowanyu ohalevelela itampi, awo khanleveleliwa.”

133 Vano va ti vatthu ekereja Katolika ni anjene akina avonnyaya vanjipale. Awo anorowa ota n'uhimya, "Miyo kinnilevelela itampi sanyu." Eyo khayari yeyo.

134 Mota xeni awo yarinaya itampi soleveleliwa, mBibiliani? Pedru ahakhula mwaha owo, Nihiku na Pentekosite. Awo yirale, "Nireke exeni hiyo wira nopowe? Mota xeni hiyo onrowahu okhalana Eyo nyuwo othene murinanyu?" Owo ahithhokiha nikano. Owo ahahimerya etthu yowira.

135 Owo khwira, "Murukunuxe murima, khula mmosa wa nyuwo, wa Muluku, nto mupatisiwe ni Nsina na Yesu Kristu." Mwaha wa xeni? Oleveliwa wa itampi sanyu. Vo siri miteko "sulupale."

136 Akavi, nyuwo alaleyi vosisu ula, akavi, nyuwo muniwiriya Masu aka mufitani ya makinete, antthuna orowa oKalvario vosisu ula? Nto nwehe etthu Muluku iralyawe weiwo mwa nyuwo. Nto muhiye iyaminelo sa mutthenkeso anyu, mulalerye Ehapari. Aleluya! Eyo eri ottuli wanyu vano. Exeni enrowanyu wira ni Yeyo?

137 "Wa orukunuxa murima ni oleveliwa wa itampi ohana olaleriwa mwa Nsina Nawe, molumwenkuni mothene, opajera oYerusalemu." Aleluya! Ovuwa! Eyo vo.

138 Exeni Kalvario enihimyaya wa nyuwo? Exeni nihiku nne niralyaya wa nyuwo? Nno nirimokhittelani, ni teologia? Nno nokhalinheni mutthu owisona? Walá nno nokhalinheni Mukristu, òthumihiwa? Aleluya!

139 Etampi, yoleveleliwa! "Miteko sulupale ovikana iya nyuwo munovara." Nyuwo munnona pani ale ari "anyuwo", khamunona? "Miteko sulupale ovikana iya," oleveliwa itampi, mwa Nsina na Yesu Kristu.

140 Masi ni iyaminelo ni iromolelo, ni sikina, iyo sinothukelelani nipuro, nyuwo nlelo munirumèla olumwenku. Mukilèle mulopwana mmosa, mukilèle muthiyana mmosa, onwerya orwa oKalvario nto anererya okhala mutthu mulupalexa okhala wira mutthu òhimya etthu. Mukilele vatthu nyuwo munweryanyu oweha witho wo oKalvario, mwa warya waya wekèkhai, nihiku nne oKalvario. Mota xeni nyuwo onweryanyu okhalana nihiku nanyu oKalvario, nto munakhuma mutthu owisona? Munwerya sai nyuwo okhuma mwatempa a mutthenkeso, ni olalerya mixuttiho sopakiwa n'atthu? Xeni eyo ehinoyevihayani mwa Masu a Muluku? Mwatonko okhalakhala murowaka iwe, munothhika owiyeviha. Mota xeni nyuwo onthunanyu okhala etthu yulupale mmutthenkesoni mwanu, ni mapururu mukofiyani mwanu, okathi Yesu Kristu Mwana a Muluku iyevihalyawe Mmansawe akhalaka erutthu yothikilasiwa, witho w'osenyerasiwa, mpakha ehaya ni ehasara? Vano awo yahimurula ikuwo Sawe, khimukhomela, oholo wa olumwenku. "Ahithokoreryaka wuliwa muru." Muniwerya sai

nyuwo orowa oKalvario ni okhuma etthu yovirikana n'ile Owo aryawe, ehasara, ehaya?

“Oh,” nyuwo munira, “awo anòkòmola.” Mwàhiye awomoleni.

<sup>141</sup> Mukhalane nihiku nanyu oKalvario, Muluku onokhalana ephiro Awe ni nyuwo. Mukihiye miyo kihimye yeyo tho. Mukhalane nihiku nanyu oKalvario, Muluku onokhalana ephiro Awe ni nyuwo.

Nivekele.

<sup>142</sup> Pwiya, O Muluku, munikuxe hiyo othene mpakha oKalvario nanano va. Munihiye nikhume mwa hiyo, Pwiya, owova atthu, wova etthu mutthu mukina onrowawe ohimya. Vano, olumwenku wothene wamutheya Yowo, wamuveha Yowo. Masi Owo ari owìwelela, mpakha wokhwani. Owo ari owìwelela, mpakha muhasarani. Owo ari owìwelela, hatá vathi va kuvernu feterale.

<sup>143</sup> Vano hiyo ninnisuwela wira okathi Satana omanne awe elapo ela, owo ari mwene ni mukhulupale mulaponi mu. Owo ahimiyaya yeyo oholo wa Pwiya ahu, iraka, “Omwene ola ti wawaka. Miyo kinimwiriha ele miyo entthunaka.” Vano hiyo ninnisuwela wira, okhuma nihiku nenne mpakha nna, olumwenku ula, vathi vo otakhaliwa, onikhala wo oholeliwa ni yowo otakhalinhe.

Masi, Muluku, O Muluku, hiyo ninrumèla Omwene ori wohitakhalihwa.

<sup>144</sup> Tithi, Muluku, mota eryaya yoreraxa, wira Nyuwo munnira itthu sulupale mwa—mwa olumwenkuni wa isinema olelo. Sikhumiheryaka ifilime iya sulupale, ntoko *Sòruma Muloko*, ni sikina, sirowaka, wira siwonihe alopwana n'athiyana, wira hatá nnakhala khisaripiha mukhora wa ekereja, nave wahiya awo wona eyo exeni. Ephiro ya Muluku ephiro yòkhottiwa, n'ulomwenku. Okhala wira hiyo niri ntoko...Hiyo ninrowa oRussia vathi va comunismu.

<sup>145</sup> Hiyo niri molumwenkuni mu, nave hiyo khanihiyo a olumwenku yola. Hiyo norowa mpakha oKalvario. Hiyo nihikhomela mmansihu vamwikimanyo, mwaha wo Omwene wa Muluku, wira nikhale mmosa wa Awawe. Khennijala etthu xeni olumwenku onihimiyaya, hiyo nnikuxa ephiro n'ale vakhani òthanyiwa a Apwiya. Hiyo ninrowa oholo mpakha mohihimuwani, ni hiyo ninnamini wira eyo eri vakhiviru mmatatani, Pwiya, mpakha okathi hiyo onrowahu ohihimuxiwa m'Omweneni yowo onrowa oxintta olumwenku ula. Sintoko Daniyeli onalyawe yeyo, nto owo wahipwexakasa olumwenku wothene, mwa ithekeni sikhani, ni epheyo yahivekhulela mpakha elapo ya ikokhola s'elimwe. Masi, mwako, Nluku nahinnuwa khukhala mwako mulupale wakhunenle elapo. Nluku nno nmimorwa. O Muluku, hiyo ninthuna nikhale epantte wa nenno. Munihiye nikhotte mmansihu, nikuxe mwikimanyo

ahu khula nihiku, nikhale wa Kristu, nikhale wa akina. Munivahe yeyo, Pwiya.

<sup>146</sup> Yakhala akina mu vosisu ula, ni ahimmusuwela Yowo ntoko Mopoli, ni yàtthuna wùpuweliwa mmavekeloni a okhomoni, ni mwatthuna wira nna nikhale nihiku nanyu oKalvario, muvenxe matata anyu, mwire, “Mukivekelele miyo, Munna Branham. Miyo kintthuna kimusuwele Yowo ntoko Mopoli aka.” Muluku orèriheni, mmiravo. Mutthu mukina tho? Muluku orèriheni, munn’aka ottuli iwo.

<sup>147</sup> Àmukhala mutthu mukina tho? Onira, “Miyo kintthuna omusuwela Owo. Miyo kintthuna nna nikhale nihiku nimoso oKalvario, wa miyo. Miyo ka mureta ni okhulumuwa. Emphwanyihani wa miyo orukuneya va ni etthu-ene yeyo miyo eyareliwaka wira kirè? Miyo kiyariwe, kiyariwe wira kikhale mwana a Muluku, nto wa miyo kinivarelela itthu sa molumwenkuni. Muluku, mukihye kikhomele vamwikimanyo olelo. Mukihye kikhomele vamwikimanyo, olelo, mmansaka ni ankhili aka, wira miyo kiwerye okhala ni Kristu, ni kakhalele akina. Khenikijala exeni awo anikirelaya miyo, okithaya, ni okilupattha, ni okihimyana sonanara sothene, ni itthu, mukihye pahi wo wiyeviha miyo kiroweke oholo, ni òmàla, ntoko mwapwittipwitthi, ntoko Owo siralyawe. Nto nihiku nimoso, Owo okilaiherya okihihimuxa tho, Nihiku nokiserya. Miyo kimpavela Nihiku nenno.” Yamukhala tho matata makina anivenxiwa? Muluku òreriheni nyuwo ottuli iwo, ni nyuwo. Ti yorera. Akina tho pahi. . . Muluku òreriheni. Muluku òreriheni. Akina tho, hiyo nihinatthi olompa.

<sup>148</sup> Tith’ihu a Wirimu, yohimmwa wira, okathi Pedru alalenryawe Nihiku na Pentekosite, “Othene ale yàmini yahinjერიwa Mukereja.” Awo vekèkhai yanamini ni murima aya wothene. Atthu ala amanle ovenxa matata aya, miyo kinnamini wira awo ahamini ni murima aya wothene. Vano awo yàri mwamini, yokhala etanki ya màsi eniwehererya va. Awo antthuna itampi iyo sileveleliwe. Okhala mutthu mu onwerya wapatisa awo ni Nsina nne, ni Nsina nimoso pahi nikhale vathi va Erimu nivahereriwe atthu, wira hiyo nikhale owopowa.

<sup>149</sup> Mana, sintoko miyo sihimalyaka Yolempwa okathi vakhani ottuli, wira, “Orukunuxa murima ni oleveleliwa wa etampi ohana olaleriwa mwa Nsina Nawe, molumwenkuni mothene, opajerya oYerusalemu.” Nto oYerusalemu, okathi orukunuxa murima ni oleveleliwa wa etampi walaleriwaya, arummwa yahimenrye wa Solempwa, ni yirale awo yàhana “orukunuxa murima, toko, nto vo apatisiwe ni Nsina na Yesu Kristu.” Owo ti wari muteko wa mulaleyi wira ìre. Wira awo arukunuxe murima, nto owo apatise awo wira aleveleliwe etampi aya. “Ale anrowanyu waleveleliwa, awo anoleveleliwa; ale anrowanyu ohalaveleliwa itampi, awo khanleveleliwa.”



<sup>150</sup> Tithi, mota xeni olumwenku okenlyaya owali sintoko aryaya? Xeni ahinaminelaya Ehapari yorera yòhitakanihiwa? Nto awo hatá anniruha-mo, mwa yeyo, wira apatilihe: masina owotha, opatiso wowotha, opatiso wa Eroho Yowarya wowotha, avahanaka mukhono n'alaleyi, akuxaka ithonyeryo sa Tithi, Mwana, Eroho Yowarya, seiyo nnakhala sihikhanle mwa Solempwa; epaphelo epakiwe ni alopwana aRoma, khahí mwixuttiho wo Okristu hatá nipuro nimoso mBibiliani. Oleveleliwa wa itampi khisinweryaneya oleveleliwa ni ithonyeryo, nave mwa Nsina na Yesu Kristu.

<sup>151</sup> Vano, Tithi, hiyo nosuwela wira eyo ti yòkhottiwa vanjene. Iphiro Sanyu kwekwe sinikhala enamuna yeyo. Masi mwahiye alopwana n'athiyana, vosisu ula, akele nihiku nne, nihiku nne oKalvario. Weiwo, Yesu, akhottaka nihiku nne, ehaya ele, yo oruliwa ikuwo, yo othikilasiwa kapatti kapatti, yo osenyerasiwa, n'utheiwa; ni olumwenku wothene, ni ekereja, n'atthu ale yatthuneya wira amphente Yowo. Nto, nlelo, mwa sothene iyo, Owo khatthukunle eyano Awe, nto ahirowa khwakhwela atthu yale yamutheya Yowo.

<sup>152</sup> Muluku, munikuxe mpakha oKalvario vosisu ula. Vano awo yahimya wira hiyo novahuwa, awo yahimya wira hiyo nniwa Solempwa vovonyeya, etthu p'itthu awo antthunaya ohimya, Muluku, awo khanwerya wemela Oholo wa Muluku ni wira ti yovonyeya.

Awo khanwerya okhunèla itampi saya ni Bibilia. Bibilia onokhunula itampi saya: ohàmini waya; okhala waya òsuweliwa; wira yireke ntoko atthu akina. Mwahiye awo arwe oKalvario vosisu ula.

<sup>153</sup> “Nto opajerya oYerusalemu; orukunuxa murima iwe ni oleveleliwa wa itampi ohana olaleriwa mwa Nsina Nawe maloko othene, opajerya oYerusalemu.”

Mwahiye awo akuxe nivalo nenle n'okhomeliwa wira athikilasiwe; n'usenyeriwa; ni otheiwa; ni wihaniwa itthu sothene awo anihaniwaya muhina wa anatini òkhottiwa; anamapwexa ikereja; sothene awo antthunaya wihana.

Wira hiyo, Pwiya, vosisu ula, nikuxe ephiro ahu n'ale vakhani òthanyiwa a Apwiya. Wira hiyo netteke ntoko arummwa sentte aya, nnakhala orukunuwela mono wolopwana walá wothiyana, nto ni murerelo wa murima ahu nimurumèle Muluku. Munivahe yeyo, Tithi.

<sup>154</sup> Vano, mwavonihe aretta ni òripiwa murima anirwa mulinyani wa mavekelo. Wira ala anvenxa matata aya, mmurimani mwaya, attharuwe, nanano va. Wira ale akhontte okathi munjene, arowe ni wakuva mmasini nto akhalane itampi saya soleveleliwa mwa Nsina na Mukuttho, Yesu Kristu, Mwana a Muluku. Amen.

Vathi vamwikimanyo vavo Mopoli aka  
okhwiyawawe,  
Vathi vale wo orapihiwa itampi miyo kàhinla;  
Vale murim'aka Ephome wahiheleliwa;  
Nivuwihawe Nawe. . .

Nivuwihawe Nsina Nawe!  
Oh, nivuwihawe Nsina Nawe!  
Oh, vale murim'aka Ephome wahiheleliwa;  
Nivuwihawe Nsina Nawe!

Miyo kihopoliwa mwa itampi vòtepa orera,  
(Sai?)

Yesu vòmàleleya onikhala muhina,  
Vale vamwikimanyo vavo Owo. . . (Okhala  
mmosa a Awawe.) mwemmo;  
Oh, nivuwihawe Nsina Nawe!

Nivuwihawe Nsina Nawe!  
Nivuwihawe Nsina Nawe! (Nsina Nòreraxa.)  
Oh, vale. . . murima aka Ephome  
wahiheleliwa;  
Nivuwihawe Nawe. . .

<sup>155</sup> Eyo pahi khenira etthu mwa nyuwo? Wokutthani pahi. Ohela nrromelo mwa nyuwo: Ekumi, Ekumi Yohimala.

<sup>156</sup> Exeni “okhomeliwa vamosa ni Kristu”? Wakhalela akina. Muthinto xeni w'akina? Ale aniwinani, ale yaharowa osiveliwa ni nyuwo, ale yarowa wotheyani: mwakhalele yawo; mukhale ni yawo; mwaphente yawo; “mwalompele ale anovarani vowunla ikuhu, anihimya mithinto sothene wa sotakhala yothaka, mwaha wa Nsina Naka. Awo yahalupattha maprofeta yakhanle muhinatthi nyuwo.”

<sup>157</sup> Miyo kupuwela wira mutthaka alakela wamukhaliherya ekereja vosisu ula, wira nyuwo mòne wira hiyo ninnimutthuna Kalvario, hiyo ninnitthuna mwikimanyo.

<sup>158</sup> Vano sothene iya sipakeliwani? Iyo sothene soliveriwa. Murokor'aka vakhaterani ya marota, wa atthu ale mu aniwereiwa ni òripiwa murima: Iyo sothene soliveriwa; etthu emosa entthuneya nyuwo wira waminí wira eyo ti yawinyu; wakhela eyo enamuna emosaru, nto nyuwo monovona.

<sup>159</sup> Mupuwele: Vano exeni iyo? Nyuwo mwamuwerya orowa mulaponi, olaleya Ehapari yorera, wavoniha aretta; ni ovaha Ekumi Yohimala.

Mota xeni yarowaya okhala yulupalexa: wa, va okhala mulopwana mmosa okilanthi va ni—ni nipotthe, kankuru, enakhalaru etthu p'itthu. (Hiyo nomona Owo imara sinjene ovaha iparakhá Sawe ni onvoniha mulopwana, onvoniha muthiyana; imara ikonto muloko wa imara ikonto wa miyaha sòhivonyeya mulaponi mothene, mòne, òkhumihwiwa m'olilini,

munrepani; iruku pahi s'atthu òlyiwa ni kankuru; olelo, akumi, atthu akumi.) "Miteko iya Miyo sinvaraka nave-tho nyuwo munovara; masi sulupale ovikana iya nyuwo munovara": "sovikana iya," ekekhaí.

Exeni? Miyo kihavaha wunjereriwa wa ekumi, mwa Nsina na Yesu, wira anjerere ekumi aya mahiku vakhani.

Nave, "Sovikana iya nyuwo munovara: nyuwo munimwavaha Ekumi Yohimala mwa Nsina Naka." Uau!

<sup>160</sup> Xeni munikhalanyu owùliwa muru mwaha wa Nsina nno nòreraxa? Xeni atthu antthyawaya n'utthikela ottuli? Owo ti xetwani. Vekèkhai.

<sup>161</sup> "Orukunuxa murima n'uleveleliwa wa etampi ohana olaleriwa mwa Nsina Nawe molumwenkuni mothene, opajerya oYerusalemu." Ti weiwo Mutthaka okhummaya toko. Eyo ekèkhai? "Orukunuxa murima n'uleveleliwa wa etampi olalèriwa mwa Nsina Nawe, opajera oYerusalemu."

<sup>162</sup> Vano, yopajerya, hiyo ninrowa wira ntoko Owo siralyawe: okhalana mavekelo wira avonihawe aretta.

<sup>163</sup> Yottharana, hiyo nnokhalana yovaha yulupale: Màsi t'olikana, ottuli nno, wa khula yole ontthuna opatisiwa (sokhala ikuwo mu s'athiyana, ikuwo mu s'alopwana), siri solikana wira nyuwo mukhalane itampi sanyu soleveleliwa; okhala wira mupuwele, wira nyuwo munowerya okhalana itampi sanyu soleveleliwa ntoko mwixuttiho wa Bibilia. "Mana khinavo Nsina nikina vathi va Erimo nivaheriwe eriyari y'atthu, nenno nyuwo murinanyu wopowa."

<sup>164</sup> Paulo ahàphwanya akina yàri opatisiwa wene. Vano awo yamukhuwela, yahixintta. Owo khwira, "Mupatisiwe mwa xeni?"

Awo khwira, "Mwa Yohani."

Owo khwira, "Yohani àpatisa mwaha wo orukunuxa murima." Vano, mwiwe ela: wo orukunuxa murima, khahí wo oleveleliwa wa etampi. Akavi aniwa sana yeyo? Khahí wo oleveleliwa wa etampi. Awo yahipatisiwa vòrera, wo orukunuxa murima. Awo yahirukunuxa murima: "Ayo, mulopwana, miyo korukunuxa murima. Miyo, kaminiki wira Owo onimorwa." Awo yapatisiwe wo *orukunuxa murima*; eyo ti yohimya, "amwaminiki Pwiya Yesu Kristu."

<sup>165</sup> Vano okathi awo yiwansyaya *ela* (wira Mukuttho wahirwa), awo yahipatisiwa emara ekina, ni Nsina na Yesu Kristu. Nto vo, yahiheliwa mwa yawo, okathi owo ìxathale awe matata awe mwa yawo, Eroho Yowarya; nto awo yahilavula ilavulelo ni ohimya s'oholo.

<sup>166</sup> Vano, mota xeni nyuwo onrowanyu ovirikanya Yolempwa eyo? Nyuwo muthonye nipuro nimosa mBibiliani vavo mutthu atonko awe oleveleliwa itampi saya, mwa Watana wa Nanano,

nto yatonko opatisiwa mwa enamumuna ekina wohikhala ni Nsina na Yesu Kristu.

<sup>167</sup> Mukonihe miyo nipuro nimosa mBibiliani vavo mutthu ti mutthu atonko opatisiwa ni Nsina na Tithi, Mwana, Eroho Yowarya. Ahiso mmuruhe vamesa vaka wahala, wahala a ekereja ononiherya nipuro mutthu atonko awe opatisiwa ni Nsina na Tithi, Mwana ni Eroho Yowarya, mpakha iyakha imiya ttharu ni itthu numalá okhwa murummwa okiserya, okathi ekereja Katolika etthokihwaya.

<sup>168</sup> Vano, miyo kokhalana *Axitithi Opajerya oNicea*, ni e... alipa-owalepa a wahala othene, ni itthu sothene, mo osomani mwaka: wahala a khalaixa, oreraxa molomwenkuni; iyoniheryo emosa pahi yohivonyeya hiyo nrinahu.

<sup>169</sup> Musome *Aletto Ahu a Ettiminku*, walá ekatekisimo a ekereja Katolika, nto nwehe seiyo, etthu iyo sinihimyaya: “Akina wa maProtestante alakela animopowa, okhala wira awo annuramela mwixuttiho wo oKatolika: Mana Bibilia aya onihimya, ‘mupatise ni Nsina na Yesu Kristu,’ masi hiyo nnikhumiha nttittimiho na ‘Nsina na Yesu,’ nuhela nenno mwa ‘Tithi, Mwana, Eroho Yowarya,’ nto awo annikhupali iyo.”

Vano, mukonihe Yolempwa emosa yovirikana ni yeyo.

<sup>170</sup> Nto eyo vo. Nto nlelo, olumwenku onuramela yeyo ene. Mwaha wa xeni? Awo khatonko okhala oKalvario. Ti yeyo. Awo khatonko wona.

<sup>171</sup> Awo animotheyani nyuwo ni owihanani nyuwo. . . awo hatá anowihanani, “Santu-owotha,” “Yesu pahi,” ni masina othene awe ósivelasiwa awo anweryaya. Etthu xeni enivirikana wa eyo awo aniwihanayani? Exeni awo. . . Owo ahijali etthu awo yamwihanaya Owo? Owo ahikhomeliwa. Owo amukhalenle Muluku, nto Muluku mekhawe. Vano vâri wira Eroho yele emosaru, yari mwa Yowo, eri mwa nyuwo, enowirihani nyuwo wira etthu emosaru: muvilelaka Nsina Nawe. “Etthu p’itthu muniranyu” (onihimya Bibilia) “ni molumo wala ni miteko, mwireke sothene mu Nsina na Yesu, mmuvuwihaka Muluku.”

<sup>172</sup> Vatthu xeni nyuwo muniphwanyanyu mwixuttiho owo, wa oraru wa epakau? Mukatekesimuni, khahí mBibiliani. Nolumo “oraru” nnakhala khannihimmwa mwa Solempwa sothene okhuma Maphattuvelo mpakha Wisupulula. Khekanle etthu ntoko eyo. Khekanle etthu iyo ntoko muluku òraru. Owo Muluku, Muluku mekhawe, Muluku mmosa. Imara sothene onkhala Muluku mmosa. Owo orumènle miteko miraru: Owo ahirumèla omosa ntoko Tithi, mwa Moise. Owo ahirumèla omosa mw’erutthu, ntoko Mwana, Yesu. Owo onirumèla vano ntoko Eroho Yowarya. Masi owo Muluku mmosa. Muluku mmosa, khahí ni masina mararu. Miteko miraru, ithonyeryo ttharu mwa Nsina nimosa: Yesu Kristu.

173 Etthu p'itthu yovirikana ti y'epakau; nto miyo kininkekela mutthu oniherye yeyo, yahikhale yeyo. Ti yeyo. Miyo kinihimya eyo mwa iyakha ni iyakha ni iyakha, nto khavo mutthu ophwannye yeyo, nlelo (Munnona?), okhala wira eyo khenweryaneya okhala. Miyo kokhalana e . . . va ori Bibilia, toko; ni akhala a wahala a khalai wira alipiherye wira eyo vekèkhai ekhweli. Vano mwaha wa xeni xetwani pahi . . . ? Miyo . . . Ahe, Bibilia ohimnye wira awo yarowa okhala siso: "Aniwerya sai awo orwa, vohikhala wira Miyo kinimwaruha?" Eyo ti vekèkhai yothene miyo ensuwelaka wa yeyo. Eyo t'ile Yesu ohimnyawe, vano . . .

174 Miyo nkinihimya eyo wira kikhale . . . Vãri vira miyo kamuhimya eyo, n'ulaleya ehapari ntoko ela, miyo kamukhala nawothe òtepaxa eriyari anyu. Ti yeyo. Miyo kinihimya eyo okhala wira Eyo Ekèkhai ni Eyo Ekumí. Othene ale apatisiwe mwa Kristu, anihela mwa Kristu. Awo akhalana Ekumi, mwa Nsina Nawe.

175 Hiyo ninvekela mwa Nsina Nawe, ophavela mwa Nsina Nawe, olaleya mwa Nsina Nawe, opatisa mwa Nsina Nawe, okhala mwa Nsina Nawe, okhwa mwa Nsina Nawe, orowa Wirimu mwa Nsina Nawe, ohihimuwa mwa Nsina Nawe. "Maloko othene Wirimu anihaniwa Yesu." Bibilia ohimnye siso: "Maloko othene vathi anihaniwa Yesu." Owo ohimya, "Miyo kirwiye mwa Aka . . ."

Nyuwo munira, "Vano, nno Nsina na Tithi."

*Tithi* khanihiyo nsina, eyo ethonyeryo. Owo ohimnye, "Miyo kirwiye mwa Nsina n'Atithi Aka, vano nyuwo khamukàkhenle Miyo." Vano, mwa Nsina xeni Owo àrwiya? Uh-huh. Vekèkhai, ". . . vano nyuwo khamukàkhenle Miyo."

176 Vano eyo vo; eyo vekèkhai, ayo, eyo ti yowipithiheriwa maitho a ale òsuwela ni a miruku. Vekèkhai, eyo ekekhai, uh-huh.

177 Nto mwa Wisupulula, ntoko hiyo nixuttihalyahu nihiku nikina: yokhala ekereja namuttompe ya khalai, yeyo ekhanle mutthenkeso wopajerya; nto vano eyo yahikhalana nikhuru n'axana axithiyana yayariwe mwa yowo. Awo anira etthu emosaru, nuhapo mmosaru. Owo othene ommalela oBabilonia, enamuna emosaru, ni e . . . ni ekereja y'oRoma ni othukumana wa ikereja wa—wa ilapo; nto owo ori vo, sothene simalelaka, sothene mwa etthu emosa, mwatiya mmosaru.

178 Masi Ekereja ya Muluku (Aleluya!), eyo Ekereja yihaneliwe ota, yovalanyihiwa. Mota xeni Ekereja etekiwaya? Mota xeni nyuwo onrowanyu osuwela ela? Mota xeni nyuwo onweryanyu osuwela ela okhala Ekèkhai? Okathi Muluku onupululawe eyo mwa nyuwo. Mota xeni a—mota xeni Abeli asuwenlyawe wira ari mwapwitiwitthi ohiya masá? Eyo yarimupululiwa mwa

yowo: “Mwaha wo wamini Abeli ahinvaha Muluku mukuttho woreraxa.”

<sup>179</sup> Akhuruwaka vaMwako vo Orukunuwa, Yesu onira, “Athu anihimya wira Miyo ki pani?”

Akina khwira, “Eliya,” “Moise,” ni akina.

Owo khwira, “Masi Miyo kinokohani nyuwo, ‘Nyuwo munira Miyo ki pani?’”

Pedru khwira, “Nyuwo mwa Kristu, Mwana a Muluku mukumi.”

<sup>180</sup> Owo khwira, “Nyuwo khamutonko wixutta eyo. . .” Ahiso (Miyo kinihimya ela, khahí wira kikhálé mulupale, masi wira kiruhe monelo mmosa): “Nyuwo khamunatoko wixutta ela oseminario; athu akina khanatoko owixuttihani nyuwo yela; masi Atithi Aka, yawo ari Wirimu, t’awupululenleni ila wa nyuwo: wira MIYO KI (khahí Tithi, Mwana, ni Eroho Yowarya, masi, Miyo ka Yesu Kristu). Nto vamwala va (Mwala xeni? Mmosaru yowo Abeli aronwawe; vasulu va mwala yowo.), vamwala va, Ekèkhai ya Muluku ya murohoni yo wupululiwa, Miyo kinoteka Ekereja Aka, nto mikhora sa wokhani khasinwerya nnakhala oxintta yeyo.” Ti yeyo. Awo animwererya eyo, masi awo nnakhala khanxintta. Munnona?

<sup>181</sup> Vano murowe oKalvario pahi, mwakhomeliwe, mutthike, nto mukuxe ephiro anyu n’ale vakhani òthanyiwa a Apwiya, muroweke oholo.

<sup>182</sup> Vano, Pwiya, hiyo ninvahererya itthu sothene wa Nyuwo. Miyo nkinsuwela, wa nikhuru nna, etthu eri mu. Miyo nkinanyiherya osuwela, Pwiya, wohikhala wira Nyuwo munimupulula yeyo. Nto vano, Tithi Muluku, miyo nkinovekelani Nyuwo wira yeyo. Miyo pahi kimanle ohela ottuli w’athu. Awo ari vo. Wira ola okhale Kalvario a ekèkhai vosisu ula; wira eyo ekhale okhomeliwa vamwikimanyo w’ekèkhai wa okhala-nthiti, ni wo witthuna, ni wa itthu sulupale sa makhalelo.

<sup>183</sup> Wira athu akhalé owiyeviha, ni otthuna okuxa ephiro n’ale vakhani òthanyiwa a Apwiya. Wira awo yetteke wo wiyeviha. Wira awo ayariwe m’Omwene mu, Omwene ola mulupale wa Muluku, yowo ori erutthu ya murohoni, erutthu ya wirimu ya Kristu vathi: “Mwa Eroho emosaru hiyo nopatisiwa mwa erutthu emosa.”

<sup>184</sup> Munivahe yeyo, Pwiya. Anakhalaru òripa, òttèla, anjano, oxerya, anakhalaru athu, mulopwana walá muthiyana, epottha walá òtaphuwa: hiyo othene nokhalihwiwa òwurya wa Eroho emosaru.

<sup>185</sup> Munivahe yeyo, Tithi, nto wira eyo ekhalé ni. . .eriyari ya anjene, vosisu ula, wira awo asuwele orattene; wira Nyuwo mutthukule miru saya. Vano, enokhala ntoko nihiku

nsya wa awo: nsuwa nnimwarya, ni warya woxankiha wa ateologia òpakiwa ni mutthu anomwareya, nto Warya wa Muluku onimwarya mphironi mwaya, ni nnokhera ekuwo yeyo enikhunèla Warya wòrera. Nto awo anowerya wetta mphito worera wa m'orerihwani, nto, yakhalelaka akina, ntoko Kristu iralyawe.

<sup>186</sup> Vano okathi onkelihahu elinya ya mavekelo, miyo kinvekela wira Nyuwo mwarèrihe arumeyi Anyu vosisu ula, othene hiyo, okathi hiyo onlompelanahu, mmosa ni mukhwawe. Nto munivahe, olelo, wira khula mutthu onwereiwa onirwa muhina wa elinya ya mavekelo ela avonihiwe. Wira awo atthike, ntoko mwana mwamuthiyana a maitho ovirikana, ni mwammiravo, ni o . . . ni muhan'ole mutokwene, ni—ni Munna Wright, ni anjene wa ale avolonwe, Pwiya, ni oripiwa murima ni iretta n'itthu ekina yeyo tothoro ohiwenryawe ovoniha; nto ala ari va olelo (yophiyeryaka esumana emosa evinre pahi), nto ala ari va, sana, olelo.

<sup>187</sup> Muluku, wira alopwana n'athiyana avire ni wamini yowo omosaru, asuwelaka wira awo anrowa oKalvario okhomeliwa vamwikimanyo ni miyupuwelo saya ni ankhili aya wira awo “avonihiwe khalai.” Wira owerya yowo wamuhihimunxe Yesu mmahiye wawahe awo ekumi, ekumi yulupale yo wamini.

<sup>188</sup> Nto vo, nananoru numalá ela, anjene arwe mutankini wira apatisiwe. Hiyo ninvekela, mwa Nsina na Yesu. Amen.

<sup>189</sup> Vano, hiyo nrina pahi minutu miloko mili wira nipajere elinya ya mavekelo ni muteko wo opatiso. Vano hiyo khanirina ittikitti sa mavekelo. Hiyo nohiya iyo, nto hiyo ninrowa wererya orumèla mmuthukumanoni mwaka sulupale wakhula okathi hiyo nnipajeryahu. Miyo kiholèlani nyuwo othene, hiyo nòhiya, hiyo nokhalana eyo mufitani, ni khula nipuro miyo onrowaka, ifita iye sinrowa oholihiwaka.

<sup>190</sup> Ethonyeryo enithonya iparakha pahi. Mupuwelo wari, “Nyuwo mwavekelelaru aretta, wakhaliha atthu owaminini nyuwo.”

Miyo khwira, “Awo khanrowa okamini.”

Owo khwira, “Nyuwo munovahiwa ikhanyeryo iya, nto ni seiya awo animwamini.” Ikhanyeryo sihoneya sirowaka sirowaka, mwa iyakha muloko mulaponi mothene, wohikhala emara emosa yovonyeya. Hatá ohivonyeya, nnakhala, mwa yeyo. Akavi ansuwela eyo okhala ekèkhai?

<sup>191</sup> Vano, nyuwo mwaweryaru wamini ekhanyeryo, vano mwamini Mutthaka. Eyo ekhweli. Eyo ennoniherya. Nto Muluku amuhela Mutthaka mwa miyo (Nto ohiya owo okhala wolikanaxa, wohikhala ele . . .) nto miyo kiholèlani etthu yarowa okhala yo wotha? Muluku khanrowa okihyererya miyo wira eyo. Nnari, nnari. Nnari, mulopwana. Miyo kinolèlani Ekekhai.

<sup>192</sup> Vano, othene nyuwo muntthuna ovekeleliwa, ntoko, elinya ela nno, murwe epannte ela nno, nyuwo mwatthunaka, vale, muthatane mono wolopwana. Nto vano eyo enimwahiya atthu okela okathi hiyo onivekelahu. Nto hiyo nnokhalana a—amiravo, anamikhora n'awo anoweha; nto okathi awo ankelaya mu, nto epannte ela nno, hiyo ninrowa waviriha ottuli, ni waviriha mwemmo. Atthu othene avekeleliwe.

<sup>193</sup> [Mutthu mmosa onilavula ni Munna Branham—Mol.] Oh, nnari, nnari, miyo nkirale. Vano, khula okathi nyuwo onthunanyu. Kho mwaha. Nyuwo poti omukumiha, walá nyuwo. . . Miyo kinniweya. . . omukumiherya ota nanano, walá numalá okathi vakhani, khula okathi owo onthunawe, kho mwaha.

<sup>194</sup> Vano, nrowe nikhale òmàla sintoko nniweryahu, mwa minutu iya vakhani sinttharelana. Miyo kintthuna nyuwo othene mukhale mpuwelaka vano: Vano, exeni ehi—exeni Bibilia ehimalyawe? “Mavekelo o wamini anowopola aretta.” Akavi answela wira eyo ekhweli? Akavi answela wira Bibilia ohimya, “Mirirya iya sinimwatthara ale anàmini. Miteko Miyo sinvaraka nave-tho nyuwo munovara”? Nto sari miteko xeni? Owo ahimnye, “Miyo kinniweya nyuwo mwaminiru wira Miyo kinniweya wira etthu ila.” Eyo ekhweli?

Yokoha aka yari exeni? “Awo khanrowa okamini.”

Owo khwira, “Mirirya iya sinowiriha awo wamini.”

<sup>195</sup> Vano, nyuwo mwaminiru, mukhale òlikana: Ola okathi anyu wo ovuluwa. Vekèkhai vamosaru ntoko sarowaya okhala wa etampi, owo natiri mmosaru a Muluku mmosaru.

<sup>196</sup> Vano, hiyo nokhalana muthiyana, mwamukhani onwereiwa va, orina mukatthamiho wa mmirimani, onikhuma ohitto New Albany. Hiyo ninrowa onvekelela yowo, toko, wira akuxe yawawe—akuxe ekhukulo awe. Vano, vòmàleleya, nto atthu othene, vano. Miyo kintthuna axinna akikhaliherye miyo, va. Nto nrowe nùramihe miru sahu okathi vakhani, vano, wira nivekele.

<sup>197</sup> Vano, Tithi a Wirimu, ala ti Masu Anyu. Miyo nkihiyo kinthokorerya mwaha w'etthu enrowa wiriwa ni yawo, nave miyo kinthokorerya mwaha wo olaleya yawo. Nto kisuwelaka ela (nto kisuwelaka wira miyo ki mutthu owunnuwa vakhani vano, nto nihiku nno kihana okumana ni Nyuwo): Miyo kolalerya Ekèkhai ya mmurimani mwaka. Nyuwo mosuwela eyo. Khahí wira ekhalé ethiru, vàri siso, Pwiya, nto miyo kinnitthuna orukunuxa murima.

<sup>198</sup> Nto Tithi, miyo kinvekela wira Nyuwo munikhaliherye, vano, okathi hiyo onrowahu wavekelela aretta, wira mavekelo aka yakhuliwe, khahí mavekelo aka pahi, Pwiya, masi mavekelo a ekereja ela, ntoko atthu ala òhawa. . . Ankhi ala yari amwar'aka yemenlene va? Ankhi yari yawo, akilanthene



vakhaterani ya rota? Walá murokor'aka? Amai aka? Oh, Muluku, mwavonihe atthu ala. Munimwavoniha Nyuwo, Pwiya?

<sup>199</sup> Nkàweheni, yemenlene munlinyani wa mavekelo: mukattamiho wa murima, kankuru, nipotthe, enamuna sothene sa iretta ni mixankiho. Anjene wa awo animorwa (imiya anovuluxiwa, vava vene, Pwiya), ni awo annona eyo, ni awo annamini iyo, nto awo anorwa munlinyani wa mavekelo wira yakhele yawaya. Awo anorwa wa Nluku nikumi vano, khahí murumeyi Anyu, masi wa Mwan'Inyu, Yesu, Yowo ori Muhòleli a Ekereja, Mutthu a murohoni, a esiri eriyari ahu. Nto okathi hiyo onrowahu, nivahaka Nsina Nawe (Nyuwo mohimya, "Mwa Nsina Naka awo anowomola a xetwani."), miyo kinvekela wira Nyuwo mwakhule mavekelo ahu, mwa Nsina na Yesu. Amen.

<sup>200</sup> Vano, atthu othene akhalé avekelaka. Vano, ela ekwaha yawinyu, nave. Ala mavekelo anyu.

Vano mwamuthiyana ola ohana okhwa, yahikhale Etthu enimukhaliherya.

<sup>201</sup> Akavi animusuwela Munna Stadskev? Munna ni Murokora Stadskev? Miyo kahihaniwa w'Alemanha imara ttharu ohiyu omosa; mwana aya àrimokhwa. Awo khuvekela, "Munna Branham, hiyo nòwonani nyuwo, mwa Eroho ya Muluku, wahihimuxa atthu òkhwa," (Awo yakhala vavo ni oweha yeyo. Munnona?) "ni hiyo nosuwela wira nyuwo mwa profeta a Apwiya. Muhimye Masu pahi."

Miyo khwira, "Miyo nkiniwerya ohimya eyo, wohikhala wira awo aniheliwa mwano mwaka."

"Murwe w'Alemanha." Miyo kahivenya nananoru. Nto awo yamwattanke arami: "Nòkhalana nteke na jato ninwerya woruhani w'Alemanha muhina wa iwora thanu namosa." Jato a anatoropa yowo àrowa okivaviha mpakha w'Alemanha wira kamuhihimuxe mwana òkhwa. Jato a anatoropa àrowa okiroiha muhina wa iwora thanu na mosa, okhuma oLouisville mpakha oMuniqué, w'Alemanha.

<sup>202</sup> Miyo kirowa iwe, nto kikokhora, nto miyo khwira, "Tithi, kihimye exeni? Mulavule mwano mwaka." Owo khuhikàkhula. Miyo kirowá mpakha mutakhwani, miyo khwira, "Tithi, kihimye exeni? Muhele molumo mwano mwaka. Miyo kinorowa mahalene, mwahiheleru." Miyo kihokolowa, Owo khuhikàkhula. Kivolowa. Ohiyu wothene miyo kivekela, "Pwiya, muhele mòlumo mwano mwaka." Hat'etthu yowakhuliwa.

<sup>203</sup> Vosisu aya amwar'aka khuvenya. Vamanlyaya okhuma, Masu (miyo kivenya), Owo khwira, "Muhùlumele eyo. Nna ntata n'Apwiya." Uh-uh.

Vano nananoru mpakha vatelefonini: "Miyo nkinwerya orwa. Nnari, nna ntata n'Apwiya. Miyo kòkhottihwi." Nyuwo

munnona owerya ori munttaroxoni mme? Okathi Muluku iralyawe, “Nyuwo muhire ethhu iyo, mana nno ntata n’Apwiya.”

204 Vano, Moise, okathi uwo, ahilèliwa wira ahire ethhu, khirowa khwira enamuna p’inamuna. Nyuwo munnupuwela? Vano miyo—miyo nkaronwe.

205 Nto miyo kamuwerya woruhelani molumo wira kiwoniherenyi wa athhu axexe ovirikana, yawo, yahimèriwe okhwa ni matothoro, numalá ovekela ni wulumeliwa okhwa. Munnona? Hiyo nnimwèmela vo wira nùlumele ethhu ile. Nto Muluku ovahanru owerya wo wira ethhu, vanrèrela nyuwo mukhale òkasopa ethhu muniranyu. Munnona? Vanrèrela nyuwo mukhalé òka- . . . Owo khwira, “Muhi . . .”

206 Vano, mupuwele, eyo poti ohihimya ethhu mwa nyuwo vanjene, masi mwa miyo, eyo yahihimya ethhu. Munnona?

“Muhulumele ethhu ila.” Nsu nekèkhai, nòrera nòmàleleya (ekhatiri ya iwora thanu na mosa ni miloko miraru, miyo kokhupali wira yari yeyo, thanu na mosa ni miloko miraru vosisu ule) khwira, “Muhulumele ela. Nna ntata n’Apwiya.”

Miyo khwira, “Koxukhuru, Tithi. Koxukhuru, Pwiya. Miyo nkinrowa wira.”

207 Owo àhimmyeru wira, “Mùlumele eyo. Owo nwanani ikelinhe.”

Miyo kamwira, “Nrowe.” Nto miyo kamwira.

208 Okathi mwammiravo ole iwe oFilandia àrupathi awe vale, òkhwa-ene, ònyanyeya, nnakhala nikhuva nikumi mw’erutthuni mwawe, Apwiya khwira nne nari ntata na Satana, khwira, “Mùlumele.”

209 Nto miyo khwira, “Okhwa, nyuwo khamunwerya onvarelela owo. Mmuhokoloxe, mmuhiye ataphuwe.” Vavale, owo ahitupha, mukumi, nnakhala nikhuva nowunteya m’werutthuni mwawe. Awo ti Masu a Apwiya. Miyo nkinwerya orumèla Masu a Apwiya mpakha Masu a Apwiya akirwele miyo.

210 Masi mwa Yolempwa, Masu a Apwiya àkivaha muteko wo wavekelela athhu aretta; ahovahani muteko wo wavekelela yawo. Vano, “mavekelo o wamini anowopola aretta;” nivekele, nyuwo muramihe miru sanyu; hiyo nnimona ethhu Owo onihimyawe, okathi nyuwo onkelanyu.

211 Nyuwo mwa Mukristu, mwa yowo? Nyuwo munnamini ni murima anyu wothene wira Yesu onorowa wokhalihani sana? Murina mukattiyamiho mwamukhani wa mmirimani; munhaxeya wa iyakha, murokora. Vano, nyuwo munrowa okhala sana, nyuwo mwaminiru.

212 Vano, Pwiya Muluku, mwamuthiyana ola ohana okhwa wohikhala wira Nyuwo munomukhaliherya. Vano miyo

kinvekela, ntoko miyo sininwehaka, miyo nkinona hatá nthowa wira owo akhwe.

Nto miyo kinnona murohoni mwaka, Pwiya, wira nno ohiyereya Wanyu wireya, vano, miyo kinulumelaka ela: Satana, mmuhiye ola ataphuwe!

Mwa Nsina na Yesu Kristu, wira owo akhale sana, arwe ekereja, yela ahimye onamòna wa ovuwa wa Muluku. Amen.

<sup>213</sup> Vano, vokhweyaxa ntoko siriyaya, muhano, nyuwo munorowa okhala sana. Nyuwo munnamini iyo munna?

[Munna Branham onikhuma vamikrofoni—Mol.] Nyuwo munnamini vathi va, wira nyuwo munorowa okhala sana?

Muroweke vano, mupajerye olya khula okathi etthu nyuwo. . . nyuwo nto, munokhala sana.

Vano, nyuwo munwehererya ovaha olumwenku nikuma, ni ohileiha; owo wahovahani nikuma, ni wahohileihani. Vano, Muluku a Wirimu ole onikumihani nikuma Nawe mulaponi wira avahale oleveleliwa wa etampi, mu Nsina nimosaru, onniwerya wovahani oleveleliwa wa etampi, okhumihani nikuma niri mwa nyuwo, ni wokhalihani nyuwo sana.

Munnamini wira Owo onniwerya okhaliha murima owo omumula sana? Nyuwo mwire yeyo, munokhala sana. . . ? . . .

<sup>214</sup> Pwiya Yesu, mwamuthiyana ola òhawa ohana okilathi vakhaterani va makhalelo othene ni tho, okhumihani wa-vo. Masi hiyo ninvekela wira ikuru iya sa Satana sikhumihiwe mwa yowo. Wira owo akhale ni ette ni akhale orattene sintoko atonko awe okhala. Hiyo ninvekela eyo mwa Nsina na Yesu. Amen.

<sup>215</sup> Nyuwo munnamini? Owo muteko wòmalihiwa, eyo ehiriwa. Mulattu xeni? Wohikhalana wova, wohikhala ni. . . Khayari. . . ? Nyuwo mwahivonihiwa kankuru emara eyo. . . ? . . . Mutaphuwe, muvahererye itthu sothene wa Yesu.

<sup>216</sup> Pwiya Yesu, miyo kinimwixatherya ntata naka muthiyani'ola ni wulumela eretta awe. Miyo kosuwela wira ola Mukristu, oyariwa ni Eroho. Miyo kinnikhumihiwa eyo mwa yola, mu Nsina na Yesu Kristu Nsina noreraxa. Amen.

<sup>217</sup> Pwiya Muluku, wa munna awe onimphentawe, miyo kinvekela wopowa wawe mu Nsina na Yesu. Muvarelele yeyo. Amen. Enimwiriwa.

<sup>218</sup> Nyuwo molikana wira mwàkhele ovona wanyu, mwan'aka? Ayo, eyo yorowa mmatatani Mwawe.

<sup>219</sup> Pwiya Yesu, mwa mwammiravo ola, yola ohimbye, wa Nyuwo, owo onvekela wira akhele ovonihiwa wawe. Ntoko murumeyi Anyu, miyo kininxathi matata aka mwa yola mu Nsina na Yesu Kristu. . . ? . . . Amen.

Vano, pahi khula. . . ? . . . vano, nyuwo mwihane Nsina Nawe pahi. Vano, khahí—khahí wa miyo. . . ? . . .

220 Tithi Muluku, ntoko mwana mmosa otonko ophiterya vatthirima va amey'awe, awo amwavaverya ni—ni avekela ni yowo khuvarela ntata nawe namukhani okathi owo aryawe mwana a mawowo. Vano, Satana omuroiha empa y'atthu ovahuwa. Muluku, owo ohorwa Ekereja yowarya ya Muluku mukumi, Ekereja eyariwe mwa Eroho ya Muluku, Ekereja Eroho ya Muluku enikhalaya—mo, ni wikhaliha Mmansaya yosuweliwa. Nto olelo, ni mavekelo, hiyo ninnimutaphula muthiyana ole empa yeyo. Mwa Nsina na Yesu Kristu, hiyo ninnivekela. Amen.

Muroweke owani, nyuwo mokhala sana.

Koxukhuru mwaha wo orwa, wavekelela amay'inyu; ola mwana a ekèkhai.

221 Nna nihiku n'otaphuwa wanyu. Pwiya Yesu, wa mwamuthiyana ola, wa wopowa wa aiy'awe ni otaphuwa wa mmilo awe, owo akhele eyo mwa Nsina na Yesu Kristu, Yowo onira wira “murwe, mwamini eyo nanano,” nto owo murèrelo wòmalihiwa.

222 Pwiya, matothoro ahimya, Pwiya, eyo eri mw'erutthuni mwawe, erwaka mmaithoni mwawe. Ola ohorwa wira ataphuliwe, valtari va, okathi Ekereja ela yowarya enivekelaya, miyo kinvekela otaphuwa wawe mwa Nsina na Yesu Kristu, ekoi ila ekhume mw'erutthuni mwawe. Owo muteko wòmalihiwa.

Wa mwan'awe, miyo kinnireriha nleso nna. Wira maiwelo ni mukhalelo worera otthikele mmaruni mwawe...?...

223 Vano Ekereja enolavula; vano Ekereja Erutthu ya siri ya Kristu. Hiyo othene nnovekelelani nyuwo. Munnona? Hiyo khanni—hiyo khannihimya okhala tho molumwenkuni. Hiyo khaninlavula mwaha wo otikinihiwa otthu onrowa ahu. Hiyo nòphwanya Ephiro. Hiyo niyariwe Ephiro yeyo. Hiyo na Ekereja ya Muluku Mukumi (epantte ya yeyo); vekèkhai, eyo emwaraxeliwe mulaponi mothene. Masi nla nikhuru na yawo. Olelo, hiyo nnorwa vamosa mwa Nsina Nawe. Hiyo nnorwa wira etthu Owo ohimalyawe, wira. Exeni Owo ohinupululawe okathi hiyo onrwahu vamosa. Mwavekelele aretta, nwixatherye matata yawo, “mavekelo o wamini anowopola aretta.”

224 Mukattiyamiho wa murima anyu wohiyeni. Mwa Nsina na Yesu Kristu, miyo kintthariha muteko Muluku okivahalyawe...?...



*NIHIKU NNE OKALVARIO* EMK60-0925  
(That Day On Calvary)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettaka 25 mweri wa Setembro, 1960, empa Branham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okumiheriwe ni okaiwe ni Voice Of God Recordings.

EMAKHUWA

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)